

Mareko

Yeng Yesuac Siduc Gombang Ohoec

1 ¹Yomoc Yesu Kristo Anutuac Medac, yeac siduc gombang hanahema fingerec, ²imocac siduc. Profete Yesaiango yofi ohoec, “Negenna, ni siducedena sueba yeng waraigemma singga mengeregenude. *(Marekai 3:1)*

³Nga bangec kisiu kpakpac mong yofi fingerude, ‘Ngeni KEBUAC sing wisima singa heitumeigec.’” *(Yesaia 40:3)*

⁴Yoc imocac sirihau Yohanengo haec. Hama bangec kisiu kecma ngicngac ubangina dzigeneu kopocsicngina kpac anudeac mitidoku nadzicgedeac edekpou ayemmeec. ⁵Nga ngicngac yeni Yudaia prowins nga Yerusareng taonnunac amanene yearu kenggec. Kemma kopocsicngina deficgemagec yeng Yodang dokuu namma doku nadzicyemmeec.

⁶Yohane ye ngakpia kamere dzoeango memea, imoc heima fadenga mong yangseberango memea, imocngo kebangau dzegeec. Amma ye ipua nga kateac kukundzau nekefec. ⁷Ye ngicngac yoc yofi edekpou ayemmeec, “Ngic neac ngadeu haude, yeac kucngo neac kuc ferahade. Ni ifiango ngonducnema yeac hanitabea witiha yungecba naric mi ngereeude. ⁸Ni doku nadzicngemmeduae nga yeng hama Tiri Asungo nadzicngemmeude.”

⁹Naso imohai Yesungo Nadzarete taong Gariraia bangec wama Yodang dokuu hasikeec. Hasikeu Yohanengo doku nadzicmiec. ¹⁰Nadzicmiu Yesungo dokuunac eremanu imohaingoc kurumeng anggeu Asungo kebesacac siric amma yearu mau henec. ¹¹Hemmanu kurumennunac enacudumeng mong yofi fingeru negenec, “Ge neac songomedacna, ni gengsongo anggenduae.”

¹²Nga imohaingoc Asungo Yesu sueu bangec kisiu kenec. ¹³Kemma uameme 40 kecmanu Satanggo ye tobanggeec. Tobanggeu imohai kateyang yenigoc kecmanu angero yeneng henggareng ammigec.

¹⁴Ngic yeneng Yohane witicamau faigec tacmanu Yesungo Gariraia bangecfu kemma Anutuac siduc gombang edekpou ayemmema ¹⁵yofi deec, “Naso bic hau Anutuac eucererenggo mewegenengunudeac ngeni ubangina dzigeneu siduc gombang negensinggegec.”

¹⁶Anu Yesungo Gariraia dzohong tegiau kengkecma Simong nga munea Anderea yerenu yeri ufcngira ukuma nanoc. Nocac yeri kondungyang meme ngic. ¹⁷Yeremma Yesungo yofi edeyuruec, “Ngeri hama modacnuec ngic yeneng kondungyang meandae, ngeri ifi isoc ngicmeme ua meecdeac kpoungemeccade.” ¹⁸Ifi deu yeri imohaingoc ufcngira wama Yesu modaroc.

¹⁹Nga yeni kapianec kemma Yesungo Dzebedaioac medahora Yakobo nga munea Yohane yerenec. Yeri gombau ufcngira memengere amma taroc. ²⁰Tarec yeng yeremma kpacyuruu yeri negenoc. Negemma imohaingoc mangngira Dzebedaio nga ua ngicfora gombau tacmagec wayunuma Yesu modaroc.

²¹Anu yeni Kafanaung taonnu kensikegec. Kensikemagec sabata naso anu Yesungo kpekpeturang amau emma Anutuac yoac kpouyemmeec. ²²Kpouyemmeu ngicngac yeneng kpoukpouyoara negemma imoc negenggec engena anec. Ye kpouyemmeec, imoc ngic uakibi mekeccdae, yeneac siricfu kuhagoc amma mitiac negen negengngic yeneac dede isoc mi deec.

²³Anu naso imohaingoc kpekpeturang amau ngic mong asu seuhagocngo tacma arohoc. ²⁴“Yesu Nadzarete mingina, neneac wiac imoc geac mi ande. Ge memanganenununadeac hanec me? Ni gendsuaenoc, ge Anutuac kpetiac ngic.” ²⁵Ifi deu Yesungo asu seuhagoc ngaba ammima yofi edeec, “Ge waickema ngicfunac erema kenna!”

²⁶Ifi deu asu seuhagocngo ngic mekpefac ammima kucgoc arohoma erema kenec. ²⁷Kenu ngicngac sasawango kerectegec amma yenaocngoc kpesiemegec, “Imoc noc wiac? Imoc kpoukpou gboria nga yeng ua minginaac kuhagoc kpounemmeu asu seuhagoc ifingoc yoac edeyunuu yeni yoara negemma tofohogec.” ²⁸Nga siduhango Gariraia prowinsiu bic kemma sokodarec.

²⁹Anu yeni kpekpeturang amaunac mama Yakobo nga Yohane yerigoc Simong nga Anderea yereac amau kenggec. ³⁰Kemma enggec, imohai Simong sefena sebigerec ammiu feec, imoc Yesu edegec. ³¹Edegec Yesungo yearu kemma mariaua mema miaru imohaingoc hafeia kpac anu yenenggareng ayemmeec.

³²Ifi anu wenac kiwa kemeu ama tofore hamanu ngicngac yeneng hafeigoc nga hadehade amma yafingoc sasawa Yesuaru meyunu kenggec. ³³Nga taongac ngicngac sasawa yeni ama naguyau kpedzucnegec. ³⁴Kpedzucnemagec Yesungo ngicngac hafeingina hania haniagoc mengereyunuma hadehade nga yafingngina homac kporarec.

Nga hadehade nga yafing kporacyunuec, yeni haniaya negenggecac yoac degecdeac dederac ayemmeec.

³⁵Anu ama mi wereckemmanu Yesungo kundunnungoc yacma ama wama bangec botuc mong ngiha kpacfu kemma numuec. ³⁶⁻³⁷Numuu Simong nga tosofora yeni ye hofockemma meficgema edegec, “Ngicngac sasawango ge hofocgudae.” ³⁸Ifi degec yofi edeyunuec, “Nenang taong goa wegenac tackende, imohai ifingoc kemma yoac edekpou ayemmebade. Nocac ua imocnoc mebadeac hadua.” ³⁹Ifi deu yeni Gariraia bangec yerege kenggec. Kemma kpekpeturang amasoc yeng yoac edekpou ayemmema hadehade nga yafing kporacyunuec.

⁴⁰Anu ngic kubecserigoc mongngo yearu hama fafoc heima desambic ammima deec, “Geng negenna naric anu naric medzuacnubang.” ⁴¹Ifi deu Yesungo ubea manganau maria sinema ngic kpeserema yofi deec, “Ngereenadeac songona fede.” ⁴²Demau imohaingoc kubeha mosiu sebua ngereec. ⁴³Ngereeu Yesungo ngic derahema suema yofi deec, ⁴⁴“Negenna, sebigau faka fingeccac, imocac ngic mong mi edebesena. Ge womong gareng yearu kemma sebua edzahema Mosengo seseac deec, imocac sirihau modacma faibesena! Ge ifi faina yeneng sesega hemma negentegegecde.” ⁴⁵Ifi deu yeng ine kemma siduc imoc sifu deyadie. Imocac amma Yesungo taonnu fingeccac fingeccac monggoc mi enec. Ye ine ngadeau bangec kisiu kecmanu ngicngac noboc nobocnacngo yearu hakegec.

2 ¹⁻²Uameme goa wisickemanu Yesungo monggoc Kafanaung taonnu kenec. Kenu ngicngac homacngo imoc negemma ama wakema naguya hedzickemagec yeng Anutuac yoac edekpou ayemmeec.

³Ammanu ngic ⁴yeneng ngic mong hanimaria homemea tofohoma yearu mekenggec. ⁴Mekenggec ngic homacngo nanggecac hoangau faigeccac obohoma ama witiau enggec. Emma ama bubuya meickegec titinga fingerec. Fingeru yeni Yesu nanecfu imohai ngicpuring dzakeagoc faigeccac kemeec. ⁵Kemeu Yesungo negen negensingngina hemma ngicpuring yofi edeec, “Medacna, kopocsicga bic wawaya.”

⁶Ifi deu mitiac negen negengngic goa ihai tacgec, yeneng ubanginau yofi negenggec. ⁷“Ngic imoc ye nocac yoac ifi dema Anutu emmide! Anutu mocgungo kopocsic naric waude.”

⁸Yeni ifi negenggec Yesungo ongaasuyau negengyemmema yofi edeyunuec, “Ngeni nocac negen negeng ifia ubanginango negensidae?”

⁹Damocngo efea ande? Ngic puring yeac debesonga, ‘Kopocsicga kpac ande’, me ‘Ge yacma tofoga mema kenna.’ ¹⁰Nga Ngicac Medac, yeng bangecfu kopocsic wawaac uayoac nga kuc femide, ngeni imoc negenggeccac amma yofi deba.” Ye ifi dema ngicpuring yofi edeec, ¹¹“Ni edeguduae, ge yacma dzakega mema amagau kenna.” ¹²Ifi deu imohaingoc ngic ye yacma dzakea mema ngicngac kicnginau kenec. Kenu

ngicngac sasawango imoc hemma kpidohoma kerectegec amma Anutu dengerema degec, “Wiac yomoc mi hehennina yaguc fingeru hendimbe.”

¹³Anu Yesungo ama imohanac mama dzohong tegiau kenec. Kenu ngicngac homacngo yearu kenggec kpoukpou ua meec. ¹⁴Nga kemma Rewi Arifaioac medac takesimeme ameau taru hemma yofi edeec, “Ge hama ni modacnuna!” Ifi deu yeng yacma modarec.

¹⁵Kecma Yesungo Rewiac amau yaka nema tacmanu takesimeme ngic nga manganameme ngic homacngo Yesu nga medacfora yenigoc yaka momoc negec. Ngic ifia homacngo yeni modacyunuma kenggec. ¹⁶Ifi anu Yesungo takesimeme nga manganameme yenigoc tacma yaka neu farisaio yenearunac mitiac negen negengngic goa, yeneng imoc hemma medacfora kpesiyemmegec, “Ye nocac takesimeme nga manganameme yenigoc yaka nede?” ¹⁷Ifi degec Yesungo negemma yofi edeyunuec, “Ngicngac hafeingina kpac kecdae, yeni dotaac mi ayemmeude. Nga hafeinginagoc, yeneng ine dotaac ayemmeude. Nga ni ngicngac dindingac kpacyunubadeac mi mayai, kpac. Ni ine manganameme ngic kpacyunubadeac mayai.”

¹⁸Yohaneac medacfora nga farisaio yakasege kecandae, yenearunac goango hama Yesu kpesimigec, “Yohane nga farisaio medacfocngina yeni yakasege angandae. Nga geac medacfocga yeneng nocac yaka sege mi angandae?” ¹⁹Ifi kpesigec Yesungo yofi edeyunuec, “Memeturang ngicngo tosofora yenigoc taru yeneng yakasege naric mi kecgecde. Monggoc deba, yeng yenigoc tacmanungoc yakasege naric mi kecgecde. ²⁰Kecma naso monnu ngic yeneng memeturangac ngic yenearunac meickegecde, naso imohai yakasege anggecde.

²¹Ngac mongngo ngakpi esEAU kporucusuc gboria mong mi kpebiude. Kporucusu gboriango esea taiu dzamema titingtoa fingeccbac. ²²Nga ngic mongngo waing gboria bokong yang seberango memea esEAU naric mi kpeu kemeude, kpac. Waing gboriango bokong esea tindziru yerahafoc manganebaoc. Imocac waing gboria imoc bokong gboriau kpeu kemeude.”

²³Naso monnu sabata nasou Yesungo wit ua dzongiau sing modac kemmanu medacfora yeneng wit fora mocgu mocgu merecgema megec. ²⁴Merecgegec farisaio yeneng degec, “Henna, yeni nocac sabata nasou faka mi angana andae?”

²⁵Ifi degec Yesungo yofi merengyemmeec, “Dawidi nga uamedacfora yeni yakaac obohoma herenginaac homema faka anggec, ngeni imoc osonegeng mi angandae gedang. ²⁶Abiatango womong garengtoa kefec, naso imohai Dawidingo Anutuac womonnu enec. Emma ic sogong Anutuac sese faifaia, imoc menema uamedacfora ifingoc gumecyunuec. Nga ic sogong imoc womong gareng yenengsac naric negecde, ngictehec yeneng kpac.” (1 Samue 21:1-6)

²⁷Ifi dema yofi edeyunuec, “Ngicngo sabataac amma mi fingerec, sabatango ine ngicngac ngeneac amma fingerec. ²⁸Ngicac Medac ye sabataac Kebu kecdengoc.”

3 ¹Yesungo naso monnu kpekpeturang amau enu ngic mong maria noboc homemea, ye ihai tarec. ²Nga ngic goa yeni Yesu yoacfu faigecdeac negensigec amma ngic imoc sabata nasou mengereude me kpac, imocac hembikecgec. ³Hembikecgec Yesungo ngic marimangang yofi edeec, “Ge yacma botucninau nanna.” ⁴ifi dema yofi kpesiyemmeec, “Sabata nasou noc faka naric ambesonga, faka gombunga me mangana? Amma homebeso andae, yeni agengngina tinide me yunuhomenide?” Ifi deu yeneng engsac ning kpegec. ⁵Ning kpegec yeng ubasinginaac negenghodungaima herea buu kic fikengfiha amma ngic yofi edeec, “Ge mariga sinena!” deu ngic ye maria sineu ngereec. ⁶Ngereeu farisaio yeneng naso imohaingoc Herodeac arengfora yenearu ioha kemma dafiu mema kpegecdeac yoac dedzege anggec.

⁷Anu Yesu nga medacfora yeni amabangec wama Gariraia dzohonnu kemmagec Gariraia bangecfunac habu kunengngo modacyunugec. ⁸Ngicngac Yudaia bangecfunac nga Yerusareng taonunac amma Idumaia bangecfunac nga Yodang edibigeng amma Tiro nga Sidong bangecfunac, habutoa imoc yeni Yesungo faka sasawa meec, imocac siduc negemma yearu hagec.

⁹Nga Ngicngac homacngo hasikema Yesu igockebauac medacfora yeneng wage wegenac faigecdeac edeyunuec. ¹⁰Nga ye ngic homac mengereyunuu hafeigoc yeneng kemma kpeseregecdeac hefacemegec. ¹¹Nga asu seuhagoc yeneng Yesu hemma ngonducnema yofi dema kpacma degec, “Genoc Anutuac medac.” ¹²Ifi degec hania dekperagibauac Yesungo dederac ayemmeec.

¹³Anu ye tikiu emma medac goa ubango negenggosi ayemmeecmoc, deu yearu kenggec. ¹⁴⁻¹⁵Kenggec medac 12 meisingyunuma aposoro kpac yemmeec. Yemmeu yeni yegoc kecmagec yoac edekpou ayemmegecde nga hadehade nga yafing kporacyemmegecdeac uayoac nga kuc yemmeec.

¹⁶Ngic 12 meisingyunuec, yeneac kpacngina yofi, Simong, kpara mong Petoro miec, ye ¹⁷amma Dzebedaioac medahora Yakobo nga munea Yohane, yereac kpacngira Boanerges yemerec. Imocac titiha, parandangac medac. ¹⁸⁻¹⁹Nga Anderea amma Firipo nga Batoromaio amma Mataio nga Toma amma Yakobo, imoc Arifaioac medac nga Tadaio amma Simong Kananaio nga Yuda Karioto amaunac, yeng kecma Yesu kerereu megec.

²⁰Anu Yesungo amau kensikeu habutoango hama kpedzucnegec medacforagoc yakaneneac titing mong mi fingerec. ²¹Wiacfora yeneng yofi negenggec, “Ye ubea sufude.” ifi dema megecdeac kenggec.

²²Nga mitiac negen negengngic Yerusarennac hagec, yeneng degec, “Ye hadehade nga yafing yeneac ngictaungina Bedzeburu, yeac kucfu hadehade nga yafing ngicngac yeneacunac kporacande.” ²³Ifi degec Yesungo kpacyunuma yoac heima yofi edeyunuec, “Satang yengenaocngoc dafi kporacemeude? ²⁴Bangec monggac ngicngac yeni ngaba angemema tohogecdeu bangec imocngo naric mi fekefude, kpac. ²⁵Nga amamana mocgungo tohoma ngaba angemeudeu amamana imocngo kpac anude. ²⁶Nga Satangngo tohoma yengenaocngoc kporacemeudeu ye ifingoc kpac anude.

²⁷Ngic mongngo ngic kuhagoc, yeac amau emma iwaiya naric mi wangerude, kpac. Ye ngic kuhagoc imoc witickemaguc amea manau emma iwaiya tacde, imoc naric wangerude.

²⁸Forcngoc, ngicngac yeni kopocsic hania hania angandae nga wiac hania haniaac deendema nga dedenggbaring angandae, kopocsic ifia sasawa, imocac wawa fede, imoc edengunuduae. ²⁹Nga ngic mongngo Tiri Asu denggbaringgeude, yeac kopocsic ine wawaya mi fede. Kopocsihaac turunga imoc fekengkecbesande.” ³⁰Yeneng degec, “Ye asu seuhagoc.” imocac amma yeng ifi edeyunuec.

³¹Anu Yesuac nonggo munafora yeneng sobennu kensikema ngic mong suema degec, “Yesu ye mabeso.” ge ifi edena. ³²Ifi degec Yesungo habu yeneac botucfu tacmanu ngicngac yeneng edegec, “Nonggo munafocga ngadeau namma ge hofocgudae.” ³³Ifi degec yeng merengyemmec, “Damoc yeneng neac nonggo munafocna?” ³⁴Ifi dema yegoc momoc tacgec, kiwa yenearu fima yofi deec, “Nonggo munafocna imoc ngicngac ngeni yomoc tacdae. ³⁵Nga ngic Anutuac songo nga negen negeng modacma yeac ua mekecdae, yeneng neac nonggo naing nga dacmunafocna.”

4 ¹Yesungo dzohong tegiau monggoc kemma ngicngac edekpou ayemmu homacngo yearu kpedzucnema hagec. Imocac yeng gomba monnu emma ihai tacma edekpou ayemmec. ²Amma ye yoac heima yoac homac kpouyemmema yofi deec,

³“Negenggec, gbome kpegi kpegingic mongngo gbomea kpegiudeac uau kenec. ⁴Kemma kpegiu gbome goa mama sinnu heiu neng yeneng hama nedacgec. ⁵Nga goa harongannu heiu ihai bangec efanec feecac gbome imoc bic nemonggema ereec. ⁶Erema godea ine homac mi faiecac wenacngo erema kpeu gbome imoc ururuema homeec. ⁷Nga gbome goa haseng manau heiu hasengngo yadima heihomeu fora kpac anec.

⁸Nga gbome goango bangec gombungau heima kpea nemonggema fora gombunga anec. Monggac imoc gbomea 30 nga monggac 60 amma monggac 100, ifi fingerec.” ⁹Yesungo ifi dema yofi edeyunuec, “Kedzahagoc yeng yoac yomoc negembeso.”

¹⁰Anu ngicngac habutoa kenggec medacfora 12 nga ngicngac goa yegoc kecgec, yeneng yoac heihei imocac hania Yesu kpesimigec ¹¹yeng yofi

edeyunuec, “Anutuac eucererenggac negen negeng sufu sufuya, imoc ngeni bic ngemmengemma. Nga ngicngac ngadeau kecdae, yeni ine yoac heiheiusingsac yoac sasawa negenggecde. ¹²Ifi anu

‘Yeni kicnginango hemma wiac mong ine mi henggecde nga kedzacnginango negemma wiac mong sifu mi negentegecgecde. Imocac yeni ubangina mi dzigeneu kopocsicngina kpac ambacac kopocsic wawa mi anggecde.’ ” *(Yesaia 6:9-10)*

¹³Anu Yesungo yofi edeyunuec, “Ni yoac heima deduae, ngeni imocac hania mi negendaue yoac heiheiac hania goa monggoc deba imoc ifingoc dafi negentegecgecde. ¹⁴Gbome kpegi kpegi ngicngo Anutuac yoac kpegiec. ¹⁵Gbome sinnu heiec, imoc ngic goa yeni yoara negenggec nga Satang ye ine bic hama gbome ubanginau kpegi kpegia meickeude.

¹⁶Nga gbome harongannu heiec, imoc ngic goa Anutuac yoac negemma heresongogoc bic hoanggecgecde. ¹⁷Amma yoac ubanginau godea mi meecac naso wegenaneacsac taru Anutuac yoacac amma kpendzeng me yunukporac faka fingeru yeni makpegecde.

¹⁸Nga gbome hasennu heiec, imoc goa yeni Anutuac yoac negenggec. ¹⁹Negemma bangectoa bangec yomocac kekecac fagung nga dzofinacac faitobang nga wiac goaac hensongo angandae, imoc sasawango ubanginau kemema yoac heihomeu fora mong mi fingerude.

²⁰Nga gbome goa bangec kerehagocfu heiec, imoc ngic goango Anutuac yoac negemma mekecgec fora fingerude. Goango 30 nga goango 60 amma goango 100 meficgeude.”

²¹Yesungo monggoc yofi edeyunuec, “Ngic mongngo kifa kpiacma pake bageau faima mi kperahaude me tatak bageu faiu tarude, imoc kpac. Kifa imoc tatahau faini tacande. ²²Wiac sufu sufuu fede, imoc kecma didiu fingectegerude nga wiac seme semea, imoc kecma kperagiau fingectegerude. ²³Mong ye kedzahagocngo yoac yomoc negembeso.”

²⁴Amma Yesungo yofi edeyunuec, “Ngeni yoac yomoc negentegecbisia. Ngeni wiac kpetea isinggema ngicngac yemmeandae, ngic yeneng kpete siriha ifiangoc isinggema turung kpoungemmegecde. Yeni kpoungemmema imocac sirihau meemma monggoc ngemmegecde. ²⁵Imoc yofiac, mong ye wiac goa femide, ye wiac monggoc migece. Nga mong ye wiac mong mi femide, yearunac wiabisic femide, imoc ifingoc wangegecde.”

²⁶⁻²⁷Amma monggoc yofi deec, “Anutuac eucererenggac siriha, imoc ngic mongngo gbome kpegiec, ifi isoc. Kpegiu hadzing toforec feyac ammanu gbome imoc nesarima ereude. Nga imoc dafiace ereude, imoc ngicngo mi negentegecde. ²⁸Nga bangec yengenaoc wiac meyadiu erema tebang angkecde. Amma fora amma wadzima kpauueude. ²⁹Kpauue fora kpememe naso anu ye semeng bic kperecgeude.”

³⁰Yesungo monggoc yofi deec, “Nenang Anutuac eucererenggac siriha yofi heima deni naric anude. ³¹⁻³²Anutuac eucerereng imoc mastet

gbomea isoc. Mastet gbomea imoc gbome sasawa yeneac kapiangina. Nga imoc bangecfu faini erema yadima semeng uaac mondzang feracyunuma fawa kuneng angande. Nga sawau neng yeneng imocac nokumucfu hama faec heima tacgecde.”

³³Yesungo yoac heima yoac ifia homac dema ngicngac negen negengnginaac sirihau Kebuac yoac edeyunuec. ³⁴Amma yoac deec, imoc ine yoac heimasac edeyunukefec. Edeyunuma medacfora meyunuma tembuclu kemma hania dekperagima edeyunukefec.

³⁵Anu ama marai anu Yesungo medacfora yofi edeyunuec, “Nenang dzohong noboc kenni.” ³⁶Ifi deu yeni ngicngac habutoa wayunuma Yesu gombau bic tacmanu yeni ye wangecma kenggec. Kemmagec gomba goango ifingoc modacyunugec. ³⁷Nga imohai firang engena kpeu tembong kucgoc kpeu dokungo gomba manau erema gomba mewakebeso anec. ³⁸Anu Yesungo gomba ngadeau kparicgang heima gau femanu medacfora yeneng midima degec, “Kpoukpou, kemebesonga andimbe, ge imocac fagung mong mi anec me?” ³⁹Ifi degec ye gauunac yacma firang kpetarimima dzohong yofi edeac, “Ge waickema fena!” ifi deu firang kpac anu dzohong imoc ning kpema eng fec.

⁴⁰Feu Yesungo medac yeneac yofi deec, “Ngeni nocac kengec andae, negen negensinggina mong mi fede me?” ⁴¹Ifi deu yeni kengec nga damutoa yombong amma kpesiemegec, “Ye noc ngic, firang nga dzohongtoa yereng yeac enac tofohodape.”

5 ¹Anu dzohong ferecgema Gerasene bangecfu edigeng kenggec. ²Kensikema Yesungo gombaunac mamamu ngic mong asu seuhagocngo kicsereunac hama Yesu meficgeec. ³Ngic imoc ye kicsereu feyac angkefu ngic mongngo ye witickeudeacsoc mi anec. Nga yeni sengngo witickebeso ifingoc obohogec. ⁴Ngic yeni naso homac hanimaria sengngo witickegec yeng seng kperegedarec nga hania aiengngo witickegec, imoc ifingoc kperegedarec. Nga ngic sasawa yeni ye mendanggegecdeac obohogec.

⁵Ngic imoc ye hadzing toforec kicsereu nga fagannu arohoma yengenaoc sebia hocfu heiherecge angemekefec. ⁶Amma ye hereaugoc Yesu hemma nedzikemma haniau makpeec. ⁷Makpema serianguc arohoma deec, “Yesu Anutu engenatoaac Medac, neac wiac imoc geac mi ande. Ni Anutuac kicfu edeguduae, ge kpendzenu mi fainuna.” ⁸Yesungo asu seuhagoc kporaru yearunac erema kenudeac edeac, imocac amma ngicngo ifi deec. ⁹Ifi deu Yesungo yofi kpesimiec, “Ge kpacga merac?” kpesimiu deec, “Ni kpacna habutoa, nocac neni homac.”^a ¹⁰Ifi deu ye kporacyunuu bangec imoc mi wagecdeac seriyombonggema derecgec.

¹¹Anu bangec botuc imohai berechabutoa mong fagang wegenacfu surukpema kecgec. ¹²Kecgec asu seuhagoc yeneng yofi dema desambic

^a 5:9 “Kpacna Region” deec. Region imoc ami areng mong kpetea 5 tauseng me 6 tauseng.

ammigec, “Ge suenununa berecfu kemeni.” ¹³Ifi degec Yesungo negengyemmu yeni ngicfunac erema berechabu yenearu kemegec. Kemegec berec yeni fagannunac nedzima dzohonnu kemema doku nema homedagec. Nga berec homegec, yeneac kpetengina imoc 2 tauseng isoc.

¹⁴Anu berecgareng yeneng kengec worama taonnu nga amabisicfu ngic kegec, yenearu kemma faka fingerec, imocac siduc edeyunugec yeneng imoc hengecdeac hagec. ¹⁵Nga yeni Yesuaru hasikema henggec ngic hadehadehabugoc warac kefec, yeng negentegecma wamba heima taru yeni ye hemma kengecyunuec. ¹⁶Nga ngic kicnginango faka imoc henggec, yeneng ngic hadehadegoc, yearu faka fingerec nga berec yeneac siduc momoc ngicngac ayemmegec.

¹⁷Nga yeni yoac imoc negendacma Yesungo amabangecngina waudeac edegec. ¹⁸Ifi edegec ye gombau emmanu ngic hadehadegoc ngereec, yeng yegoc kenudeac derecgeec. ¹⁹Derecgeu Yesungo ine kpetarimima yofi deec, “Ge amagau kemma Kebungo geac ubea manganeu wiac sasawa anggendac, imocac siduc tosofocga ayemmebesena.” ²⁰Ifi deu ye kemma Yesungo faka sasawa yearu meec, imocac siduc Dekaporisi bangecfu ngicngac yoac dekperagiyemmu yeni imoc negemma kerecgec anggec.

²¹Anu Yesungo gombau emma monggoc dzohong ferecema hasike nammanu ngicngac homacngo yearu heockema kemma kpedzucnegec. ²²Kpedzucnemagec kpekpeturang amaac gareng mong kpara Yairo, yeng hama Yesuac haniau makpema desambic amma deec, ²³“Naroanna homebeso ande. Ge hama marigango witiau faina ngereede.” ²⁴Edeu negemma kemmaec ngicngac habutoango hefacemema yearu hagec.

²⁵Anu ngac mong ihaingoc nanec, ye sacherec amma kecmanu kifa 12 bic anec. ²⁶Amma ye kpendzeng kpema dota homac yenearu kemma hiedzoya eng kpedzonggeu sebiau ngerec ngeree mong ine mi fingecmiu eng monggoc manganeec. ²⁷⁻²⁸Amma ngac imoc ye Yesuac siduc negemma ngicngac ngadenginausing kemma yofi negenec, “Ni ngakpia kpeserema ngereebadenoc.” ifi negemma Yesuac ngakpihereha kpesereec. ²⁹Kpesereu imohaingoc sawa gbanggeu sebia nomaneu kpendzenga kpac anu negengemeec.

³⁰Nga Yesungo yofi negenec, kucna tosea ferecgedac, imocac amma habutoa yenearu dzigenema yofi kpesiyemmeec, “Merang ngakpina kpeseredac?” ³¹Ifi deu medacfora yeneng degec, “Ngicngac homac yeneng hefacgumagec geng merang kpeserenude dema kpesinec, imoc mi heide.” ³²Nga Yesu ye ine ngacngo kpesereec, ye hentegerudeac fikengfiha anec. ³³Ammanu ngac ye kengec kpeu dzonoma fedeu Yesuac haniau makpema haniaya hafoangoc deficgedarec, nocac sebiau faka fingerec, imoc negenec. ³⁴Deficgeu Yesungo yofi edeec, “Naroang, negen negensinggango mengeregudac. Ge sebiga ngereeu ruaegoc kenna!”

³⁵Anu Yesungo yoac denammanungoc ngic goa yeneng kpebung garenggac amaunac hama Yairo edegec, “Naroangga bic homedac,

kpoukpou monggoc ebic mi mina!” ³⁶Ifi degec Yesungo yoacngina wama gareng yofi edeec, “Ge mi kengecguu, eng negensingena.” ³⁷Ifi dema habu kpetariyemmema Petoro nga Yakobo amma munea Yohane, yeni meyunuu kenggec. ³⁸Kemma garenggac amau kensikema henu ngicngac habu yeni ubahodung amma kpeborongtoa kpema kiacsonggong anggec.

³⁹Nga Yesungo ine ama manau emma ngicngac yofi edeyunuec, “Ngeni nocac kpeborong kpema kiacdae? Naroang ye mi homedac, ye gau fede.” ⁴⁰ifi deu yeni dzomoremigec. Yeng ine ngicngac sasawa kporacyunuu ngadeau madacgec. Magec naroanggac nonggomama nga medacfora harebec meyunuu naroang feec, ihai enggec. ⁴¹Emma mariaui mema yofi edeec, “Tarita koumi!” imocac titiha yofi, “Ngacbisic, ni edeguduae, ge yacna.” ⁴²Ifi deu naroang ye imohaingoc yacma kengha anu yeneng hemma kpidohoma negenggec imoc wiac engena anec. Naroang imoc ye kifaya 12 anec. ⁴³Nga Yesungo faka fingerec, imoc mi deficgegecdeac seria deracyunuma naroang yaka migec neudeac edeyunuec.

6 ¹Yesungo bangec imoc wama yengena amabangehau kenu medacfora yeneng modacgec. ²Nga sabata naso anu ye kpekpeturang amau emma ngic edekpou ayemmeu ngicngac negemma tacgec yeneng kerectegec amma degec, “Negen negeng imoc merang kpoumiec nga uayoac merang miecac mariango faka kuhagoc ifia mekecde?” ³Ye Mariaac medac nga amamemengic. Ye Yakobo nga Yosec amma Yuda nga Simong yeneac dacngina nga naingfora yeni nenanggoc kecdac.” Yeni ifi dema dehesi amma wagec.

⁴Nga Yesungo yofi edeyunuec, “Profeteac amafora nga sactosofora amma arengfora, yenengsac yeac ewea mi heiandae.” ⁵Nga ye faka kuhagoc mong yenearu meudeacsoc mi anec. Ye ngic hafeigoc mocgu mocgusac mariango kpesereyunuu ngereegec. ⁶Nga yeni mi negensingegec negenu naric mi anec. Amma ye guruama tackenec, imohai yerecgema edekpou ayemmeec.

⁷Yesungo medacfora 12 kpcacyunuma yohockang yohockang hendzicyunuma asu seuhagoc kporacgecdeac uayoac nga kuc yemmema sueyunuec. ⁸Amma yeng yofi dema dederecge ayemmeec, “Ngeni singgac mefic mong mi mema yasusac mebisia. Ngeni yaka me hie mi mebisia amma dzo mong fadeng nabehau mi baribisia. ⁹Ngeni hanitabe faima ngakpi yohockang ine mi mekembisia.” ¹⁰Ifi dema yofi edeyunuec, “Ngeni kemma ama monnu kensikegec ngic yeneng ama heingemmegec ngeni ama imohai tacyac angkecgec wisickeu wama amabangec monnu kembisia.

¹¹Nga amabangec monnu kenggec ngic yeni mi hoangngunugecde amma yoacngina mi negenggecdeu ngeni haninginaunac yube kpegec mau amabangec imoc wabisia. Nga ngic yeni imoc hemma haniangina negentegecbisia.” ¹²Yesungo ifi deu yeni kemma ngicngac ubangina

merenggecdeac Anutuac yoac edekpou ayemmegec. ¹³ Amma yeni hadehade nga yafing homac kporacyunugec nga ngicngac hafeigoc kerecngo nadzicyemmema mengereyunugec.

¹⁴ Yesuac siduc imoc bangeha bangeha sokoma kenu ngictau Herodengo yoac imoc negemma yofi negenec, “Yohane dokunadzicngo homecfunac gborima yarecac amma faka kuhagoc meudeac kuc femide.” ¹⁵ Ifi degec ngic goa yeneng degec, “Imoc Eria.” nga goango degec, “Ye profete. Profete warac kegec, yeni isoc.” ¹⁶ Anu Herodengo ine yoac imoc negemma deec, “Yohane ubea kperecgeai, yennoc gboriec kecde.”

¹⁷⁻¹⁸ Nga Herodengo munea Firipoac enema kpara Herodia, ye hamangec mema mekefec. Faka imocac amma Yohanengo Herode yofi edec, “Ge munagaac enema menec, imoc singngo mi dede.” Ifi deu Herodengo ngicfora edeyunuu Yohane mema witickema witicamau faigec. ¹⁹ Anu Herodiango Yohaneac herebu negenec. Negenu Herode ye ine Yohaneac kengec kpeu garenggeecac amma Herodiango kpeudeac sing obohoec. ²⁰ Imoc yofiac, Yohane ye ngic dindingac nga kpetiac, Herodengo imoc negentegecma henggareng ammikefec. Amma ye yeac yoac negemma naso homac negengyohoc meficgema sifu yoara negenudeac ammiac.

²¹ Kecma Herodiaac naso gombunga mong yofi fingerec. Herodengo fingec fingec nasoyau ngickuneng yeac bageau kegec nga wasaingicforaac enara amma Gariraia bangecfunac ngicenara, yeni heitaiyunuma neneyaka ohoyemmegec. ²² Ohoyemmema tacmagec Herodiaac naroangngo hama kicnginau yegec fedec. Fedeu Herode nga ngic yegoc yaka negec, yeneng imoc hemma songo negenggec. Imocac amma ngictaungo naroanggac deec, “Ge wiac monggac negemma derecgenenna imoc naric gembade.” ²³ Dema nemuya monggac kpacfu yofi deseriec, “Ge wiac sasawa derecgenenna gengyombonggebade nga bangecna nobohaac dena mendzicma gembade.”

²⁴ Ifi deu naroang ye kemma nonggea kpesimiec, “Ni noc wiacac debade?” deu nonggeango deec, “Ge Yohane dokunadzicac oruha dena.” ²⁵ Ifi deu naroang ye imohaingoc ngictau yearu kemma deec, “Yohane dokunadzicac oruha yagucngoc terau faima nennadeac anende.” ²⁶ Ifi deu ngictaungo ubaebic meec. Amma ngic tacgec, yeneac kicfu yoac bic deseriecac amma ine imoc wabesonga negenu naric mi anec. ²⁷ Nga ye imohaingoc wasaingic mong sueu Yohaneac hatea mehaudeac witicamau kenec. Kemma Yohaneac ubia kperecgema ²⁸ hatea imoc terau faima mehama naroang miu naroangngo imoc mekemma nonggea miec. ²⁹ Anu Yohaneac medacfora yeneng siduc imoc negemma kemma farenga mehama tonggogec.

³⁰ Aposoro yeni monggoc Yesuaru kpeturangge hama wiac sasawa anggec megec nga edekpou ayemmegec, imocac siduc ammigec. ³¹ Nga

ngicngac homac yeneng kengha anggecac tacnegeng nga yakaneneac titing mong mi fingerec. Imocac Yesungo medacfora yofi edeyunuec, “Ngeni hagec tembucnina kecnideac nigoc bangec kisiu kemma kecnegembisia.” ³²Ifi deu yeni tembucngina gombau emma bangec mong ngiha kpacfu kenggec.

³³Kemmagec ngicngac homacngo ine yenemma yentegecma taong tackenec, imohacnac nedzima warac warac ihai kensikegec. ³⁴Kensikema Yesungo gombaunac mama ngicngac habutoa ifi yenemma yeneac ubahodung negenec. Nocac yeni rama garengngina kpac kecdae, ifi isoc kegec. Ifi negemma wiac homac edekpou ayemmeec. ³⁵Ayemmema kefu marai anu medacfora yeneng yearu hama degec, “Bangec yomoc ngiha kpac anu naso bic kendacde. ³⁶Imocac ge ngicngac sueyununa ama tackende, imohai kemma yaka bummenec ambisia.” ³⁷Ifi degec yeng yofi deec, “Ngeneng yaka yemmegec negec.” Ifi deu merenggec, “Neni kemma 200 denarigo^b yaka bummeahama yemmeni negecdeac denec me?” ³⁸Ifi degec Yesungo yofi kpesiyemmeec, “Ngenearu ic sogong dafiguc fede, ngeni kemma henggec.” Ifi deu kenghemma edegec, “Ic sogong marimong nga kondungyang yohockang metacdimbe.”

³⁹⁻⁴⁰Ifi degec yeng ngicngac kpindzinnu matacgecdeac edeyunuec. Edeyunuu yeni mama goa 100 nga goa 50 ifi habu mema kpindzinnu tackenggec. ⁴¹Tacmagec Yesungo ic sogong marimong nga kondungyang yohockang imoc meec. Mema kiwa kurumennu fiu enu kenehema ic sogong tuema medacfora ngicngac gumecyunugecdeac yemmeec. Yemmema kondungyang ifingoc mederema yemmu medagec. ⁴²Mema ngicngac sasawango negebec amma ⁴³ic sogong nga kondungyang tosea neti anggec feu kpedzucnegec kemema sakac 12 wakeec. ⁴⁴Ngic yaka negec, imoc yeneac kpetengina 5 tauseng.

⁴⁵Nedagec wisickeu Yesungo ngicngac faiyunuudeac namma medacfora sueyunuu yeni waraima gombau emma Besaida taonnu kenggec.

⁴⁶Kemmagec ye ngicngac faiyunuma numuudeac tikiu enec. ⁴⁷Nga ama toforeyemmu gombango dzohong dzongiau kemmanu Yesungo tembuha yeigeng kefec. ⁴⁸Kefu medacfora kemmagec ama werec wereckenggac firangngo kenggecfusing haecac puri kpebibiegec. Ifi anggec Yesungo yenemma yenearugeng dzohong witiau titi kemma feracyunubeso anec.

⁴⁹Ye dzohong witiau titi kenecac yeni hemma ine wosongango hade, ifi negemma kengec amma arohogec ⁵⁰yeng yofi bic edeyunuec, “Ngeni wosongina makiu, imoc ni, ngeni mi kengecngunuu.” ⁵¹ifi dema gombau emma yenigoc taru firang kpac anec. Nga yeni ongangina worau kerecgec anggec. ⁵²Amma yeni herengina dzege dzegea fecac amma yakau faka fingerec, imoc mi negentegecgec.

^b 6:37 200 denari imoc burumaka 6ac bungngina isoc ande.

⁵³Anu yeni dzohong ferecgema Genesarete bangecfu kensikema gombangina dzegegec tarec. ⁵⁴Taru gombaunac mamagec ngicngac yeneng Yesu bic hensigec. ⁵⁵Hensima amea amea nedzikemma ngicngac hafeigoc tofou faiyunuma, “Ye ihai me ihai kecde.” imoc negemma ihai meyunu hakegec. ⁵⁶Yesungo taonnu nga amabiscifu endaru ngicngac yeneng ngicngac hafeigoc meyunuma didiu faiyunugec ngakpia susiaac witiha kpeseregecdeac deregegec. Amma kpeseregec, yeni sasawango ngerreegec.

7 ¹Farisaio nga Yerusarennac mitiac negen negengngic goa yeneng Yesuaru hama kpeturanggema kecgec, ²imohai Yesuac medacfora goa yeni maringina mi dzuac dzuac yaka menec anggec yenenggec. ³Imoc yofiac, farisaio nga yudangic sasawango bangecfocnginaac singyoac modacma maringina dzuacmaguc yaka neandae.^c

⁴Amma yeni emenecfunac hama doku nadzic nadzihia kpac yaka eng mi menec amma faka goa ifia momoc kpbanggema angandae. Yeni kpakeneac nga sokoc amma birikeng ifingoc dzuacmaguc neandae. ⁵Ifi anu farisaio nga mitiac negen negengngic yeneng Yesu kpesimigec, “Medacfocga yeni nocac bangecfocnina nga esangabofocnina yeneac singyoac mi modacma maringina mi dzuac dzuac yaka eng menec angandae?” ⁶ifi degec yeng yofi edeyunuec, “Profete Yesaiango ngic ikoha ngeneacnoc kpefing fora yombong yofi ohoec,

‘Ngichabu yomoc yeni enacbibicngo sesehenuandae nga herenginango ine neac hereau kecdae. ⁷Yeni ngicngac wiac kpouyemmeandae, imoc ngicac singyoac edekpou ayemmeandae amma ni eng dengerenuec hembra fora kpac angkecde.’

(Yesaia 29:13)

⁸Ngeni Anutuac dedeseriyoac meickema ngic yeneac singyoac hoanggeandae.”

⁹Amma monggoc yofi edeyunuec, “Ngeni ngenang singyoac hoanggeandaeac Anutuac dedeseriyoac meickeyombonggegecde.

¹⁰Mosengo yoac mong yofi deec,

‘Ge nonggo manghocga seseheyurubesena.’ nga ‘Ngic mong ye nonggea me mamaac sowecyoac deude, ye homebeso.’”

(Makekeng 20:12; 21:17; Sesememe 20:9; Dedeseri 5:16)

¹¹Ngeneng ine yofi deandae, “Ngic mongngo nonggea me mama yofi edema deude, ‘Wiac gamba nanggugudeac dedua, imoc bic Anutuac sese^d dedua.’ ¹²Ifi deu ngeni ngic nonggea me mama meficgeudeac dekpitari ammigegecde. ¹³Amma ngeni singyoacngina kpbanggema Anutuac yoac semema faka goa ifia homac angandae.”

^c 7:3 Ge imocac hania “Yoac goaac dedekperagi” imohai hennade. Hafac 1130 ^d 7:11 Sese imoc Hebraio yoacfusing Korban

¹⁴Yesungo ifi dema ngichabu monggoc kpacyunuu hagec yofi edeyunuec, “Ngeni kedzac kpema negentegecdacgec. ¹⁵Wiac mongngo ngadeaunac kemeande, imocngo ngic ubahere naric mi heidzadzu kpeude, kpac. Nga ngic heremanaunac wiac ereande, imocngo ine ngic heidzadzu kpeude. ¹⁶Ngic kedzahagoc kecde, yeng yoac yomoc negembeso.”

¹⁷Ye ifi dema ngicngac wayunuma amau enu medacfora yeneng yoac heima deec, imocac kpesimigec yofi edeyunuec, ¹⁸“Ngeni negen negentegecngina kpac, ifi isoc kecdaengoc. Ngadeaunac wiac mong heremanaunac kemeande, imocngo naric mi heidzadzu kpeude, ngeni imoc mi negentegecdac me? ¹⁹Wiac imocngo ubanginau mi kemeandac hereu kemema isinggeu keractennu kemeude.” Yesungo ifi dema yaka sasawa nenideac desorongaiec. ²⁰Amma torokpema yofi deec, “Wiac mong ngic ubahereunac ereande, imocngo ine heidzadzu kpeude.

²¹⁻²²Nga ngic ubahereunac wiac yofia ereande, negen negeng mangana nga Kaiserofaka amma hamangecfaka nga ngickpekpe amma eweeneng mewa nga kic hodung amma manganaac areng meme nga ikoc faka amma faka sicsauha nga keracmangang amma desureyoac nga sebiengeng amma ubafong, ²³imoc sasawango ubahereunac erema ngic heidzadzu kpeude.”

²⁴Anu Yesungo yacma imohacnac kenec. Kemma Tiro nga Sidong amabangecfu kensikema ama monnu enec. Enu ngicngac yeni taong imohai siduha mi negenggecdeac, ifi negenec amma ye ine sufuma tarudeac obohoec. ²⁵⁻²⁶Ammanu imohaingoc Sirofoinikia bangecfunac grikgac mongngo haec. Hama Yesuac haniu makpema naroanga asu seuhagoc kporacmiudeac derecgemiec. ²⁷Derecgemiu Yesungo yofi edeec, “Nambarac yeni yaka warac warac nema gebecyunubeso. Nambarac yeneac yaka wangecyunuma kasi yenearu ukunide, imocngo faka gombunga kpac.”

²⁸Ifi deu ngacngo meremmiec, “Kebu, imoc negenduae, amma kasi yeni sifu nambarac yeneng yaka kisisickegec tebo bageau maande, imocsac neandae.” ²⁹ifi deu Yesungo yofi edeec, “Ge yoac ifi denecac kenna, hadehade ye naroangga bic wadac.” ³⁰Ifi deu ngac ye ameau kemma henu hadehadengo naroanga bic wau naroang ye fefeau waickema feec.

³¹Yesungo Tiro bangecfunac dzigenema Sidong taong ferecgema Dekaporisi^e bangecfu sing kemma Gariraia dzohonnu kensikeec. ³²Kensikemanu ngicngac yeneng ngic mong kedzacfong nga yoac dedeac enara ebiria, ye mehama Yesu mariango kpesereudeac desambic ammigec. ³³Ifi degec negemma ye ngichabu yenearunac meickema

^e 7:31 Dekaporisi imoc titiha taong 10.

ngic ngadeau faiu nanu gbongango kedzahau faima mariau sofohoma nedzaranga kpesereec. ³⁴Kpeserema kurumennu fiu enu asu heima deec, “Effata!” Imocac titiha yofi, “Ge sarina!” ³⁵Ifi deu ngic kedzaha bic sariu nedzaranga monggoc merenu yoac tongganang deec.

³⁶Ifi deu Yesungo faka fingerecmoc, imoc ngicngac yeneng mi deyadigecdeac seria yombong deracyunuu yeni ine imoc monggoc deyadiyombonggema degec. ³⁷Ifi degec ngicngac yeni homac wareckema kerectegec amma degec, “Ye wiac sasawa mema kecde, imoc ngereeyombonggedacde. Ye ngicngac kedzacfong yeneac kedzac mesariude nga yoacngina kpac, yeni yoac meficgeyemmeude.”

8 ¹Naso imohai ngicngac habutoa yeni monggoc Yesuaru hama kpeturangegec. Nga yakangina kpac anu Yesungo medacfora kpacyunuma yofi edeyunuec, ²“Ngicngac yomoc yeni yakangina kpac uameme harebec bic nigoc kecdauac ubana manganede. ³Goa yeni amabangec hereaunac hagecac yakaya kpacfu sueyunuba amanginau kengkecma kicgigi ayemmebacac.” ⁴Ifi deu medacfora yeneng degec, “Nenang bangec kisi yofiau yaka dafiu meficgema habutoa yemmeni gebecyunuude?” ⁵ifi degec Yesungo kpesiyemmeec, “Ngeni ic sogong dafiguc mekecdae?” deu yeni “Seweng” degec.

⁶Ifi degec negemma Yesungo habu bangecfu matagecdeac edeyunuec. Edeyunuma ic sogong seweng mema Anutuac ubangerec dema tuema medacfora yemmeu yeneng mederema ngicngac arennu yemmegec. ⁷Amma ye kondungyangbisis bisic goa metagecmoc, imoc ifingoc Anutu ubangerec edema faiyemmegecdeac edeyunuec. ⁸Faiyemmegec yeni negec gebecyunuu yaka tosea tarec, imoc mema kpedzucnegec sakac 7 anec. ⁹Nga ngic 4 tauseng ihai tacgec, yeni negec wisickeu sueyunuu kengha anggec. ¹⁰Nga Yesu ye imohaingoc medacforagoc gombau emma Darimanuta bangecfu kenggec.

¹¹Farisaio yeneng hama Yesugoc yoacngina engemmama anec. Yeni kuha isinggecdeac faka kuhagoc mong kurumennunac meu henggecdeac derecgemigec. ¹²Ifi degec yeng ongaasuyau ebic meficgema yofi deec, “Naso yomocac ngicngac ngeni nocac faka kuhagoc henggecdeac derecgeandae? Foracngoc, ngicngacareng yomoc ngenearu faka kuhagoc mong naric mi fingecongemmeude, imoc edengunuduae.” ¹³Ifi dema ngic imoc wayunuma gombau monggoc emma dzohong nobocgeng kenggec.

¹⁴Naso imohai medac yeni ic sogong nigecyunuu mocgusac gombau taru mekenggec. ¹⁵Nga Yesungo gorongina kpema yofi edeyunuec, “Ngeni farisaio nga Herode yeneac yis, imocac henghomema kecbisia.” ¹⁶ifi deu yenaocngoc denegeng amma degec, “Nenang ic sogonnina kpac, imocac amma ifi dede.” ¹⁷Ifi denegeng anggec ye imoc negemma edeyunuec, “Ngeni ic sogong mi mehadauac denegeng andae nga

ngeni yoac imoc wagec. Ngeni herenegen negengngina dzege dzegeaac amma wiac mong mi negentegecdae. ¹⁸Ngeni kicnginagocngo wiac mi hengandae nga kedzacnginagoc ammanu wiac mi negengandae.

¹⁹Ni ic sogong 5 tuema ngic 5 tauseng gumecyunuba tosea taru sakac dafiguc kpedzucnegec wakeec, imoc bic nigecongunc me?" Kpesiyemueu yeni 12 degec. ²⁰"Anu monggoc ic sogong 7 tuema ngic 4 tauseng gumecyunuba tosea taru sakac dafiguc kpedzucnegec wakeec?" kpesiu yeni 7 degec. ²¹Ifi degec yeng yofi edeyunuec, "Ngeni yaguc ifingoc negen negengngina mi ireckedengoc."

²²Anu yeni Betsaida amabangecfu kensikemagec ngicngac yeneng ngic kicpisc mong Yesuaru mehama mariango kpesereudeac desambic ammige. ²³Ifi anggec ye kicpisc mariaua mema guruama ngadeau hesicke kemma kiwau sofohoma mariango witiau faima kpesimiec, "Ge wiac mong hennec me?" ²⁴Kpesimiu kicpisc yeng kic fima deec, "Ngic yeni siricngina ic isoc yenemba kengha andae." ²⁵Ifi deu Yesungo kiwau maria monggoc faiu ngereema wiac sasawa gombunga nga dindingac henec. ²⁶Henu suema yofi edeac, "Ge amagau kemma taonnusing mi embesena."

²⁷Amma Yesungo medacfora yenigoc Kaisarea Firipo taonnu kenggec. Sinnu kemmagec yeng medacfora yofi kpesiyemuec, "Ngicngac yeni neac merac deandae?" ²⁸Ifi deu degec, "Ngic goango Yohane dokunadzic deandae nga goango Eria amma goa yeneng ine profete mong esea deandae." ²⁹Ifi degec yofi kpesiyemuec, "Anu ngeni ngenaoc ine neac merac deandae?" deu Petorongo deec, "Ge Messia." ³⁰Ifi deu yeng yoac imoc ngic mong mi edeyunuecdeac deracyunuec.

³¹Anu Yesungo yofi edekpou ayemuec, "Ngicac Medac ye kpendzeng homac kpebeso. Yudangic enarafocngina nga womong gareng enara amma mitiac negen negengngic yeneng ye ubango wama kpegec homebeso. Homeu uameme harebec ammanu monggoc gborima yacheso." ³²Yoac imocac didiu yombong edeyunuu Petorongo ngadeau wangec kemma tembuclu namma kpetarimiyombonggeec. ³³Kpetarimiu Yesungo dzigenema kiwa medac yenearu fima Petoro kpetarimima edeac, "Satang, ge ngadenau hakenna. Ge wiac negennec, imoc Anutuarunac kpac, imocngo ine ngicac negen negeng ande."

³⁴Yesungo habu nga medacfora kpacyunuma yofi edeyunuec, "Ngic mong ye ni modacnubeso negendeu ye yengena ubasebiaac songo memama mariponga miacma tofohoma modacnubeso. ³⁵Imoc yofiac, ngic mong ye kekeha segereudeac negemma uaya mede, ye kekeha sufumiude. Nga ngic mong ye neac amma nga siduc gombungac amma kekeha waude, ye ine kekeha fingecmiude. ³⁶Imocac ngic mongngo bangectoa bangec yomocac wiac sasawa meficgeecac kekeha ukuu sufuude, imocngo ngic naric mi meficgeude. ³⁷Ngickekec monggoc memeaac sing mong mi

fede. ³⁸Imoc yofiac, ngic mongngo neac negenu gameagoc anude amma neac yoacnaac negenu gameagoc ande, yearu yofi fingerude, Ngicac Medacngo Mamaac kuc nga kibikperagiau angero kpetiac yenigoc haude, yeng ngic imoc yeac ifingoc negenu gameagoc anude.”

9 ¹Yesungo torokpema yofi edeyunuec, “Foracngoc, ngic yomoc nandae, ngeneanunac goa mi homemagec Anutuac eucerereng kuhagoc fingectegeru henggecde, imoc edengunuduae.”

²Anu uameme 6 wisickemanu Yesungo Petoro nga Yakobo amma Yohane meyunuu tikitoa herea monnu tembucongina kecgecdeac enggec. Emma sebia kicnginau heimeremma siriha mong yombong anec.

³Ngakpia hereha kperagima kongac koporacac yombong anec. Bangecfu ngic mongngo wamba kongac kongac ifia naric mi meficgeude. ⁴Anu imohaingoc Mose nga Eria fingecyemmema Yesugoc yoac denegeng anoc.

⁵Ifi anggec Petorongo Yesu edeec, “Kpoukpou, yei kecni songea andeac bedzo bedzo harebec meni. Geac mong nga Moseac mong amma Eriac mong.” ⁶Yeni homac kengecyunuecac ye noc wiac debeso, imoc obohoec.

⁷Ifi nammagec hoeng mongngo hama semeyunumanu hoeng manaunac yoacudumeng mong yofi fingerec, “Yomoc neac Songomedacna, ngeni yeac yoac negembisia!” ⁸Yoa wisickeu imohaingoc yeni fikengfiha amma Yesungosac yenigoc nanu henggec nga ngic mong mi henggec.

⁹Nga yeni tikiunac mamagec Yesungo deracyunuma yofi deec, “Ngeni wiac hendaumoc, imocac siduc ngic mi edeyunubisia. Kecma Ngicac Medac homecfunac gborima yaruguc ine debisia.” ¹⁰Edeyunuu medac yenaocngoc kpesiemegec, “Homecfunac gborima yacyac, imocac hania dafi?”

¹¹Yeni yofi dema kpesimigec, “Mitiac negen negengngic yeni dafiac Eriango waraima haudeac deandae?” ¹²Ifi degec yofi edeyunuec, “Eriangonoc hama wiac sasawa memengere anude. Nga mitikibiu yofi oho ohoya fede, ‘Ngicac Medac ye kpendzeng homac kpeu desure ammigecde.’ imoc dafiac negensidae?” ¹³Amma yofi edengunuba, “Eria ye bic haec nga ngic yeni songonginaac arennu faka hania hania ammigec, imoc yeacnoc oho ohoya fede.”

¹⁴Yeni tikiunac mama medacfora goa yeneng yenearu hama henggec ngicngac homac yeneac botucfu mitiac negen negengngic yenigoc yoacngina engemmama anec. ¹⁵Nga ngicngac nanggec, yeneng Yesu hemma kpidohoma bic nedzikemma wenacngerec demigec. ¹⁶Ifi anggec Yesungo kpesiyemmeec, “Ngeni nocac yoacngina engemmama ande?” ¹⁷Ifi deu habu yeneanunac ngic mongngo deec, “Kpoukpou, hadehade mong yoara kpacngo medacnaac enac mema medzickeu gearu mehaduae.

¹⁸Nga hadehadengo naso homac ye mema kpekpefac ammiande. Ammiu ye hanimaria goriu enaraunac nambang sofororoc ereu enara kirandziande. Imocac medacfocga yeneng asu mangana kporacmigeceac

deba yeni kporacibiema wadau.” ¹⁹Ifi deu Yesungo yofi merenec, “Areng yomoc ngeni negen negensingngina kpac yombong. Ni ngenigoc naso herea monggoc tacbadeac modzona tide. Ngeni medac imoc megec hau.” ²⁰Ifi deu mekenggec hadehadengo Yesu hemma medac kpefahau bangecfu makpeec. Makpeu enaraunac nambang nga sofororoc ereec.

²¹Ereu Yesungo mama kpesimiec, “Hafei yomoc noc nasoac hanahema fingeemiec?” deu mamango deec, “Imoc sabahaungoc fingeemiec. ²²Fingeemiu hadehadengo naso homacngoc medac kpehomeudeac gerecfu me dokuu kpefahau kemeande. Nga ge meficnurunadeacsoc andeu sifu ubaga manganeu meficnuruna.” ²³Ifi deu Yesungo yofi edeec, “Imoc ambadeacsoc, denec. Ngic mong ye negensinggede, yearu wiac sasawa naric fingerude.” ²⁴Ifi deu imohaingoc medac mamango arohoma deec, “Ni negensingguba negen negensinna wegenedeac geng meficnuna.”

²⁵Ifi deu ngicngac homacngo Yesuaru nedzima kenggec yeng yenemma asu seuhagoc yoac seria ammima yofi edeec, “Asu kedzacfong amma yoacga kpac, ni edeguduae, ge medac imoc wama erema kemma monggoc dzigenema yearu mi kembesena.” ²⁶Ifi deu hadehadengo kucgoc yombong arohoma tima erema kenu medac ye homemea isoc feec. Feu ngic yeneng imoc hemma bic homedac degec. ²⁷Ifi degec Yesungo ine mariaui mema miaru yarec.

²⁸Yaru Yesungo amau enu medacfora yeneng tembuclu yegoc tacma kpesimigec, “Neni dafiac hadehade imoc kporacnideac obohoding?” ²⁹Ifi degec yeng yofi edeyunuec, “Hadehade ifia yakasege kecma nunumungo kporacbesonga.”

³⁰Yesu nga medacfora yeni ama imoc wama yofi negemma Gariraia bangec ferecgema kenggec, “Ngicngac yeneng imoc mi negembisia.” ³¹Nga ye imohai kemma medacfora yofi edekpou ayemmeec, “Ngicngac yeni Ngicac Medac kererema ngic yeneac mariu faigecde. Faigec yeneng ye kpegec homeude. Homeu uameme harebec ammanu gborima monggoc yarude.” ³²Ifi deu yeni ine imoc mi negentegecma kpesigecdeac kengecyunuec.

³³Anu Yesungo Kafanaung taonnu kensikema amau emma medacfora yofi kpesiyemmeec, “Ngeni sinnu noc wiacac denegeng andau?” ³⁴Kpesiyemmu waickema tacgec nocac yeni sinnu yenanggarunac merang engena kecde, imocac denegeng anggec. ³⁵Tacgec Yesungo medacfora 12 kpacyunuma yofi edeyunuec, “Ngic mong ye enara kecbeso negende, yeng ngic tosofora sasawa, ngeneac ngadeu kecma ngeneac kingangkpekpe ambeso.” ³⁶Ifi dema nambarac yeneanunac mong mema botucnginau faima hoanggema yofi edeyunuec, ³⁷“Ngic mong ye nambarac yeneanunac mong yofia neac kpacfu hoanggeude, ye ni hoannuude. Nga ngic mong ni hoannuude, yeng nisac mi hoannuude, kpac. Yeng Anutu suenuec, ye ifingoc hoanggeude.”

³⁸Anu Yohanengo Yesu yofi edeec, “Kpoukpou, ngic mong ye geac kpacfu hadehade nga yafing kporacyemmeu hending. Amma ye nenanggoc mi kecdeac kpetarimiding.” ³⁹Ifi deu Yesungo yofi deec, “Ngeni mi kpetarimibisia. Ngic mong ye neac kpacfu ua mong kuhagoc meude, yeng kpacna bic mi demanganeude. ⁴⁰Ngic mong ye neneac ngaba mi ande, yeng ogonina anude. ⁴¹Nga ngic mong ye ngeni Kristoac medac dema doku kpakenecfu kpengemmeu negecde, foracngoc, yeng wiac imocac buma mi obohode, imoc edengunuduae.”

⁴²“Amma nambarac kapia mongngo ni negensinnukecde, ngic mongngo nambarac ifia faka mangana kpoumibacac amma ye yagucnoc dzamandzingtoa ubeau ubahemima kondungtoau ukugec kemeu, imocngo ngic yearu ngereebac. ⁴³Nga mariga mongngo anggenu kopocsic meficgenadeu ge imoc herecgema ukubesena. Mariga yohockanggoc kecma hofeac gerec pisic pisickea kpac, imohai kemebanggac maritegec kecma kekecseriu enna ngereede.

⁴⁴‘Hofeu kamangina mi homeude nga gerecngo mi pisickeude.’

(Yesaia 66:24)

⁴⁵Amma haniga mongngo anggenu kopocsic meficgenadeu imoc herecge ukubesena. Haniga yohockanggoc kecma hofeu kemebanggac hanitegec kecma kekecseriu enna ngereede.

⁴⁶‘Hofeu kamangina mi homeude nga gerecngo mi pisickeude.’

⁴⁷Me kicga mongngo anggenu kopocsic meficgenadeu imoc mesiukubesena. Kicga yohockanggoc kecma hofeu kemebanggac kicga mocusagoc kecma Anutuac eucerereng manau enna ngereede.

⁴⁸‘Hofeu kamangina mi homeude nga gerecngo mi pisickeude.’

⁴⁹Ngicngac kondung hosoandae, ifi isoc ngicngac sasawa gerecngo hosoyunubesonga. ⁵⁰Kondung imoc wiac gombunga nga imocngo ine kiacma songea kpac anudeu geng songea monggoc naric mi meficgenade. Ngeni kondung songea ubaherenginai mekecma ruaefaka angemmebisia.”

10 ¹Yesungo bangec imoc wama Yudaia bangecfu Yodang nobocengau kenec. Kensikeu ngicngac habutoango yearu monggoc kemma kpeturanggegec. Kpeturanggegec ye fakaya modacma edekpou ayemmeec. ²Nga farisaio goa yeni ye tobanggegecdeac negemma kpesimigec, “Ngic mong ye enema naric waude, imoc singngo dede me kpac?” ³ifi degec yofi merengyemmeec, “Mosengo imocac dedeseriyoac dafi ngemmeec?” ⁴ifi deu yeneng degec,

“Mosengo yofi naric annideac deec, ‘Mong ye ngac wabeso dema yeng wawakibi mima wau kembeso.’” *(Dedeseri 24:1-4)*

⁵Ifi degec Yesungo yofi edeyunuec, “Ngeni ngic ubaseri nga herengina dzege dzegea, imocac Mosengo dedeseriyoac imoc ohongemmeec.

⁶Nga hanac hanaheau Anutungo siricngira ngic nga ngac anecdeac, ifi meficyuruec. *(Fingecfingec 1:27; 5:2)*

⁷ Imocac amma ngicngo nonggomama wayuruma enemaaru kpeketau ⁸ yegoc sebi mocgu anecde. Ifi anecdeac yohockang monggoc mi andape, yeri sebi mocgu anecde. (*Fingecfingec 2:24*)

⁹ Anutungo wiac dzegeec, imoc ngicngo naric mi herecgebeso.”

¹⁰ Nga yeni amau monggoc emma medacfora yeneng imocac kpesimigec ¹¹ Yesungo yofi edeyunuec, “Ngic mongngo enema wama ngac mong meude, ye serofaka enema esea ammiude. ¹² Nga ngac mongngo ewea wama ngic mong meude, ye serofaka ammiude.”

¹³ Ngicngac goa yeni Yesungo nambaracfocongina mariango kpesereyunuudeac meyunu hagec. Hagec medacfora yeneng ine kpetariyemmegec. ¹⁴ Ifi anggec Yesungo imoc hemma negenu homac manganeu yofi edeyunuec, “Nambaracbisic yeni nearu naric hagec, ngeni kpae mi heiyemmegec. Kurumenggac eucerereng imoc nambaracbisic yofia yeneac. ¹⁵ Foracngoc, ngic mong ye nambarac kapia yeni isoc mi anudeu ye Anutuac eucererennu naric mi enude, imoc edengunuduae.”

¹⁶ Ifi dema nambarac tabucyunuma maria witinginau faima kenecyunuec.

¹⁷ Yesungo kembesonga kemmanu ngic mongngo yearu nedzikemma yeac kicfu fafoc heima kpesimiec, “Kpoukpou gombunga, ni dafi amma kekecseriac maridzoming mebade?” ¹⁸ ifi deu Yesungo yofi edeec, “Ge nocac gombunga denennec? Anutu mocgungo gombunga kecde.

¹⁹ Ge dedeseriyoac bic negennec,

‘Ge ngicngac mi yunuhomesesena, kaisero mi ambesena, hamangec mi mebesena, enacfu faifai mi ambesena, ngic yeneac wiac mong mi wangepcyunubesena, nonggo manghocga seseheyurubesena.’ ”

(*Makekeng 20:12-16; Dedeseri 5:16-20*)

²⁰ Ifi deu yeng meremma edeec, “Kpoukpou, ge denec, imoc sasawa sebigborinaungoc angereai.” ²¹ Ifi deu Yesungo yearu kic fima yeac songo negemma yofi edeec, “Ge wiac mocguac kpedadangenec. Ge kemma finacga sasawa fegende, imoc suena dzo kirecgeu imoc ngicngac makpekpea yemmebesena. Ifi anna kurumenggac dzofinac fingecgenu hama modacnubesena!” ²² Ifi deu ngic ye ubea manganeu negengebirima kenec nocac ye dzofinaha homac femiec.

²³ Kenu Yesungo fikengfiha amma medacfora yofi edeyunuec, “Ngic dzofinactoainginagoc yeneng Anutuac eucerereng manau enggecdeac ambibieyombonggegecde.” ²⁴ Ifi deu medac yeneng yoac imoc negemma kerectegec anggec monggoc yofi edeyunuec, “Nambaracfocna negenggec, ngic finactoaingoc Anutuac eucerereng manau engeng, imoc uatoayagoc. ²⁵ Kamerengo bungic singau engeng, imoc ua efea nga dzofinactoaingoc yeng Anutuac eucererennu engeng, imocngo ine uatoayagoc.” ²⁶ Ifi deu yeni kerectegec yombong amma degec, “Ifi anu merang naric komoc kpeude?”

²⁷ Ifi degec Yesungo kiwa yenearu fima yofi deec, “Ngicngac yeni imoc ambibiema wagecde nga Anutungo wiac sasawa naric mema wiac

monggac mi obohode.” ²⁸Ifi deu Petorongo deec, “Negenec, neni wiacnina sasawa wadacma ge modacguma kecdimbe.”

²⁹Ifi deu Yesungo yofi deec, “Ni fora yombong edengunuba, ngic mong ye amabangeha me daramunea me nonggomama me nambaracfora me amauaya, imoc neac nga siduc gombunggac amma waude, ³⁰yeng turunga mi obohode. Amma ye wiac wadac, imocac turunga naso 100 monggoc meude. Ngicngac yeni naso yomohai ama nga daramuna amma nonggonasia nga nambaracfora amma amaua migece, imoc sisic ammima kpekporac ammimagec mekefude. Nga ngade bangec siriha mong haude, imohai Kebungo kekecseri ifingoc miude. ³¹Anu ngic warac warac kecdae, yenearunac homacngo ngadea anggece nga ngadea kecdae, yenearunac homacngo warac warac anggece.”

³²Anu yeni sing modacma Yerusarennu kengkecmagec Yesungo waraiu medacfora yeni ye modacma negenggec wiac kuneng anec nga goa ye modacgec, yeneng kengec anggec. Nga Yesungo medacfora 12 ngadeau meyunuma wiac fingece, imocac yoac edeyunuec. ³³“Negenggec, nenang Yerusarennu endimbe. Enni ngic yeneng Ngicac Medac womong gareng enara nga mitiac negen negengngic yeneac mariu faigec, yeneng ye homeudeac desigece. Desima ye bangec monnunac ngic Anutu mi negemmidae, yeneac mariu faigec. ³⁴Faigec, yeneng faifagoc ammima sofohoma dzikacngo kpema kpehomegece. Nga uameme harebec ammanu ye monggoc gborima yarude.”

³⁵Anu Dzebedaioac medahora, Yakobo nga Yohane, yereng Yesuaru kemma deoc, “Kpoukpou, neri wiac monggac derecegede anecmenadeac negendipe?” ³⁶Ifi deec kpesiyemerec, “Ni noc wiac angecmebadeac negendape?” ³⁷Kpesiyemeru deoc, “Kecma kibikperagigau nerearunac mongngo foigau nga mongngo kanagau tacede, imoc deserinemecna.”

³⁸Ifi deec Yesungo yofi edeyuruec, “Ngeri wiac kpesidape, imocac hania mi negenghomedape. Neng kpendzenggac kpakenecfu nebade, ngeri imoc ifingoc neecdeac dedape nga doku nadzicbade, ngeri imohai nadzirecde me?” ³⁹Ifi deu yereng deoc, “Oc, naric andede.” ifi deec Yesungo yofi edeyuruec, “Ni kpakenecfu nebade, imoc ngeri ifingoc neecde nga doku nadzicbade, imoc ngeri ifingoc nadzirecde. ⁴⁰Nga merang foinau me kananau tarude, imocac fora ine neng naric mi desibade. Tatac imoc ngic damoc yeneac mengec mengerea fede, yeneng ihai tacgece.”

⁴¹Anu medacfora 10 yeneng imoc negemma Yohane nga Yakobo yereac negenggec manganeec. ⁴²Manganeu Yesungo kpacyunuu kenggec yofi edeyunuec, “Bangec monnunac ngicngac enarafocngina deyecdeyemnea, yeni ngicngac yeneac ngickuneng siricfu yenigoc kecandaeac kuc feyemmede. Nga kunengfocngina yeni kuc feyemmeu ngicngacfocngina yeneng yoacngina modacgece, ngeni imocnoc negendae. ⁴³Nga

ngenearu faka ifia ine mi fingecebeso, kpac. Ngenearunac ngic mongngo engena kecbeso ammidde, yeng ine botucnginau kingang kpekpengina kecbeso. ⁴⁴Amma ngeneac botucfunac mongngo warac warac ambeso ammidde, yeng tosofora sasawa, yeneac wanacngic kecbeso. ⁴⁵Imoc yofiac, ngicngac yeneng Ngicac Medac kingang kpemigeceac mi maec, kpac. Yeng ine yeneac kingang kpema ngicngac homac yungecyunuma kekeha wau yeneac doudeac maec.”

⁴⁶Yesu nga medacfora yeni Yeriko taonnu kensikegec. Ihai kecma ngicngac habutoa yenahafoc Yeriko monggoc wagec. Wamagec ngic kicipisic mong kpara Batimaio, imocac titiha Timaioac medac, yeng sing tegiau tacma iwaiac derecgekefec. ⁴⁷Derecgekefu Yesu Nadzarete taonnunac, yeng hama kende, yeni yoac ifi degec ye imoc negemma kucgoc kpacma deec, “Yesu, Dawidiac bangec, ge neacnec ubaga manganeu.” ⁴⁸Ye serima ifi kparu ngicngac homacngo waicke tarudeac edegec. Edegec yeng ine seria monggoc kparec, “Dawidiac bangec, ge neacnec ubaga manganeu.”

⁴⁹Kparu Yesungo namma yofi deec, “Ngeni kpacgec ye nearu hau.” deu ngic yeneng ngic kicipisicac kpacma degec, “Ye kpacgude, ge ubaga ngereeu yacma kenna.” ⁵⁰Ifi degec ngic ye ngakpihereha ukuma futucke yacma Yesuaru kenec. ⁵¹Kenu Yesungo kpesimiec, “Ni noc wiac anggembadeac negennec?” deu ngic kickundungngo deec, “Kpoukpou, kicfifi ambadeac negenduae.” ⁵²Ifi deu Yesungo yofi edeec, “Negen negensingango mengeregudac imocac naric kenna!” Ifi deu ye imohaingoc kicfifi amma Yesu sinnu modacma kenec.

11 ¹Anu yeni kengkecma Yerusareng taong mewegenebeso amma Oriwa tikiu Betefage nga Betani amabangec tarocfu kensikegec. Kensikemagec Yesungo medacfora yenearunac ngic yohockang sueyuruma yofi deec, ²“Ngeri dindingac kemma guruama sing enarau tacde, imohai emma donggi medaha mong ngicngo witiau mi tatara, imoc witickegec nande, ngeri imoc meficgema witic yungecma mema haec. ³Yungerec ngic mongngo kpesingemecma deude, ‘Ngeri dafi anecdeac andape?’ ifi deu yofi edebesera, ‘Kebungo imocgoc ua meudeac dede.’ ifi deec minginango donggi bic faiu haude.”

⁴Ifi deu yeri kemma donggi medaha sinnu ama naguyau witic witickea nanec, imoc hemma yungeroc. ⁵Yungerec ngic goa ihai nangec, yeneng yeremma degec, “Ngeri dafi negemma donggi medaha yungecdape?”

⁶Ifi degec yeri Yesungo yoac edeyuruec, imoc edeyunuec yeni negemma wayuruec kenoc. ⁷Kemma donggi Yesuaru mekemma ngakpingira herea hesima donggi medaha witiau tiameec Yesungo imocac witiau tarec.

⁸Taru ngicngac homacngo ngakpingina herea hesima sinnu tiamegec goango ua tegiaunac ic fawa herecgema sinnu faikengec.

⁹Nga ngicngac kiwau kenggec nga ngadeau modacgec, yeneng kpacma yofi degec,

“Ohec, ngic Kebuac kpacfu hade, ye kenehagoc, hosanna.

(Mitiyegec 118:26)

¹⁰ Mannina Dawidiac eucerereng hade, imoc kenehagoc. Wi kurumennu kpara dengeregec, ohec waec, hosanna.”

¹¹ Yesungo ifi Yerusarennu emma Anutuac womonnu enec. Emma hennegeng andacma ama marai anecac medacfora ¹² meyunuu Betania amau kenggec.

¹² Wereckengau yeni Betania wama mama Yesungo hereaac homeec. ¹³ Homema hereau fima fig ic mong maria tengging tengging henec. Hemma negenu foragoc isoc anu ic haniau kensikema maria meficgeec. Fig nasoya mi anecac ifi anec. ¹⁴ Nga ye fora hofocma ic yofi edeec, “Gearunac ngic mongngo fora monggoc mi nebeso.” ifi deu medacfora yeneng yoac imoc negenggec.

¹⁵ Yesungo Yerusarennu kensikema Anutuac womonggac oda manau enec. Emma ngic wiac emekpesi anggec, yeni imohacnac kporacyunuec. Ye ngic hiedzo emekpesi anggec, yeneac tebo heimerenec nga kebesac emegec, yeneac tatic heimeremma ¹⁶ Anutuac womong manau wiac ifia meenggecdeac kpetariyemmeec. ¹⁷ Kpetariyemmema yofi edekpou ayemmeec, “Yoac yofi oho ohoya fede,

‘Amana imoc bangeha bangeha ngicngac sasawa yeneac nunumuama, kpara ifi kpacbesonga.’

(Yesaia 56:7)

Nga ngeneng merenggec imoc ine hamangecngic yeneac sufu sufuama ande.”

(Yeremaia 7:11)

¹⁸ Ifi deu womong gareng enara nga mitiac negen negengngic yeneng imoc negemma ye kpegecdeac sing hofocgec. Nga habu sasawango yeac kpoukpouyaac negenggec engena anec nga yeni ine yeac kengecyunuec. ¹⁹ Nga ama marai anu Yesu nga medacfora yeni taong wama kenggec.

²⁰ Wereckengau yeni sinnu kemma henggec fig ic imoc godeaunacngoc sokuema nanec. ²¹ Nanu Petorongo imoc hemma negensima Yesu edeec, “Kpoukpou ge henna, ge fig ic soweckedang, imoc bic ururuema nande.”

²² ifi deu Yesungo yofi merennec, “Ngeni Anutu negensinggebisia.

²³ Foracngoc, ngic mong ye ubeau negengyohoha kpac kecma wiac mong me mong dema imocac fora fingerudeac negensiudeu yeng tiki edimoc yacma kondunnu kemeu deu imoc foranoc fingerude, imoc edengunuduae. ²⁴ Ni imocac amma yofi edengunuduae, ngeni wiac imocac me imocac negensima menide, ifi negemma negensinggema numugec wiac imoc fingecngemmeude.

²⁵ Anu ngeni namma numuandae, imohai ngic monggac wiac me monggac ngaba mekecdaeu kopocsiha wabisia. Ifi anggec kurumeng Mangnginango ngeneac kopocsic ifingoc waude. ²⁶ Nga ngeni ngic yeneac kopocsic mi wagecdeu ine Kurumeng Mangnginango ngeneac kopocsic ifingoc mi waude.”

²⁷Yesu medacforagoc yeni Yerusarennu dzigene enggec. Emma Yesungo Anutuac womong manau yerecemanu womong gareng enara nga mitiac negen negengngic amma enarafocngina, yeneng yearu hama kpesimigec, ²⁸“Ge noc kucfu ua yomoc menec nga merang ua imoc menadeac uayoac genes?” ²⁹Ifi degec Yesungo yofi merengyemmec, “Ni yoac mong kpesingemmeba turunga edenugecguc ni ifingoc uakibinaac hania imoc edengunubade.

³⁰Yohanengo dokunadzic ua mekefec, ua imoc kurumennunac me ngicfunac, ngeni imoc edenugec negemba.” ³¹Ifi deu yeni yenaocngoc denegeng amma degec, “‘Imoc kurumennunac.’ ifi denideu yeng yofi kpesinemmeude, ‘Ifi negemmaguc ngeni nocac ye mi negensingegec?’” ³²Nga ngicfunac, imoc debesonga ngic yeneac amma kengecyunuec. Nocac ngic yeni sasawango Yohane ye profete fora, ifi negenggec. ³³Imocac yeni Yesu meremmigec, “Imoc mi negendimbe.” degec Yesungo yofi merengyemmec, “Ifi degec, ni ifingoc noc uayoacac kucfu ua mekecduae, imoc mi edengunubade.”

12 ¹Yesungo monggoc yoac heima yofi edeyunuec, “Ngc mongngo waing ua gboria mong homecma oda dzegeec. Dzegema waing tidzac tidzameac teng usuma gareng yeneac kicfifiac amaherec meec. Meu wisickeu waing ua garenggegedecac ngic meficyunuma yenigoc yoac dedzege anggec nga yengenaoc ine bangec hereau kenec. ²Kemma kecmanu fora kpememe naso hau wanacngiha mong sueu waingngic yenearunac waing uaac fora noboha yeac anec, imoc meudeac kenec. ³Kensikemanu waingngic yeni wanacngic mema dzoboya kpema entegeng suegec kenec. ⁴Kenu minginango wanacngic mong yenearu sueu kenu yeneng ye kpefuhama desofoc ammigec.

⁵Ifi ammigec ua minginango serima wanacngic monggoc mong sueu yenearu kenu ye kpehomegec. Kpehomegec ua minginango wanacngic homac sueyunuu kenggec ua ngic yeneng medac goa dzoboyunugec nga goa ine yunuhomegec. ⁶Wisic wisickeau ua minginango songomedacyombonga mocgu kefec, ye yofi negemma sueec, ‘Yeni sifu medacyombonna eweheimigecde.’ ⁷Ifi negemma sueu ua ngic yeneng ine medacyombonga hemma denegeng amma edeemegec, ‘Yeng kecma ua yomoc tiu enude, imocac ngeni hagec kpeni bangeha nga maridzominga imoc nenang ambeso.’ ⁸Yeni ifi dema ua minginaac medacyombonga mema kpehomema farenga waing ua ngadeau ukugec kemema feec. ⁹Anu ua minginango dafi anude? Ye hama waing ua ngic yunuhomema waing uaya imoc ua ngic areng mong yemmeude.

¹⁰Mitikibiu yoac yofi oho ohoya fede,

‘Amameme ngic yeneng hoc mong mangana dema ukugec. Nga hoc imocngo amaac hoc wotung amma seria nanude. ¹¹Nga faka imoc Kebu yengenaoc meu ngicngo hensongo ammidimbe.’ Ngeni yoac imoc osonegeng angandae.”

(Mitiyegec 118:22-23)

¹²Nga Yesungo enara yeneac negemma yoac imoc heima deec, yeni imoc bic negenggec. Nga yeneng ye mendanggegedeac sing ine hofocgec. Nocac yeni ngicngac yeneac kengecyunuu wama kenggec.

¹³Ngicenara yeneng Yesu tobanggegec yoacdedeau makpeu yoacfu faigecdeac negemma yofi anggec. Yeni farisaio nga Herodeac arenunac ngic goa yearu sueyunugec ¹⁴yeneng Yesuaru hama degec, “Kpoukpou, yoac fora dema ngic engena me mamea yeneac mi negensianne. Ge ngicngac areng socfungoc ayemmekecnec, imoc negendimbe. Nga ge Anutuac sing dindingac edekpou anemmekecnec. Ifi anu ngictau Sisa takesi mibesonga me mi mibesonga, singngo dafi dede? Nenang ngictau Sisa takesi naric minide me kpac?”

¹⁵Ifi degec Yesungo ikocfakangina negentegecma yofi edeyunuec, “Ngeni nocac faitobannu fainudae? Ngeni dzo mong meficgema edzacnugec hembra.” ¹⁶Ifi deu yeni dzo mong migec yeng imoc hemma yofi kpesiyemmec, “Onga nga kibi yoc, imoc meracac?” kpesiyemmeu degec, “Imoc Sisaac.” ¹⁷Ifi degec Yesungo yofi edeyunuec, “Imocac ngeni Sisaac wiac, imoc Sisa mibisia nga Anutuac wiac, imoc Anutu mibisia!” Ifi edeyunuu negemma kpidohogec.

¹⁸Sadukaio areng yeni homecfunac yacyac mi fede, ifi dekecdae. Nga yeneacunac ngic goa Yesuaru hama kpesimigec, ¹⁹“Kpoukpou, Mosengo dedeseriyoac yofi ohonemmec, ‘Ngc mong ye ngac mema gboriha mong mi kpeficge kecma homeudeu ngac ye kefu muneango daraac hodzec mema gboric kpeficgema daraac kpac miacbeso.’ (*Dedeseri 25:5-10*)

²⁰Naso monnu daramuna seweng yeni kecgec. Nga waracdacnginango ngac mong mema gboriha kpac kecma homeec. ²¹Homeu muneango ngac imoc mema ye ifingoc gboriha kpac kecma homeec. Homeu munea mongngo faka imocngoc anec. ²²Nga daramuna seweng yeni ngac imocngoc mema gboricfocngina kpac kecma homedacgec. Homedacgec hodzecngina kecma ngade homeec. ²³Homeu ngic seweng yeneng ngac imocngoc megecac kecma yacyac nasou homecfunac yacgecde, imohai ngac imoc meracac enema anude?”

²⁴Ifi degec Yesungo meremma yofi edeyunuec, “Ngeni mitikibi nga Anutuac kuc, imoc mi negentegecdae, imocac amma yoac desufudae. ²⁵Kecma homegec yeneng homecfunac yacgecde, imohai ngicngac yeni mi meemegecde. Nga manggac mongngo ‘Ni naroanna ngic mibade.’ imoc naric mi deude. Yeni imohai kurumenggac angero, yeni isoc anggecde. ²⁶Nga homecfunac yacyac deba, ngeni yoac yomoc Moseac kibi imoc osoandae, Mosengo icfu gerechorang fingeru hemma ihai kenu Anutungo yofi edec,

‘Ni Abrahang nga Isaka amma Yakobo, yeneac Anutu.’ (*Makekeng 3:6*) ²⁷Nga ye ngic homemea yeneac Anutu kpac. Ye ngic gbori kecdae, yeneac Anutu. Ngeni sing homac yombong segema kecdae.”

²⁸Anu Yesugoc demereng anggec, yeng turunga gombunga merengyemmu mitiac negen negengngic yeneurunac mongngo imoc hemma Yesuaru hama kpesimiec, “Dedeseriyoac damocngo engena yombong ande?” ²⁹Ifi kpesimiu Yesungo yofi deec, “Dedeseriyoac engenangina yofi fede,

‘Israengic ngeni negenggec, Kebu Anutunina ye mocgu nga ³⁰ge ubaherega nga ongaga amma negen negengga nga kucga sasawa, imoc hafoangoc Kebu Anutugaac heresongo negemma kecbesena.’

(Dedeseri 6:4-5)

³¹Nga mong yofi,

‘Ge geangga anggengande, siriha imocngoc ngicngac gegoc wegena kecdae, yeni heresongogoc hoangyunubesena.’ *(Sesememe 19:18)*

Dedeseriyoac imoc yereac engena mong mi fede.”

³²Ifi deu mitiac negen negengngicngo meremmiec, “Gombunga kpoukpou, ge fora yombong denec. Anutu ye mocgu, mongngo ye isoc mi kecde.” ³³Nga ubaherega hafoangoc nga negen negengga hafoangoc amma kucga hafoangoc yeac songo heregoc negemma kecbesena amma geangga anggengande, siriha imocngoc ngicngac gegoc wegena kecdae, yeni heresongogoc hoangyunubesena, wiac imocngonoc Anutuac hosuc heihei amma sese hania hania ferahade.”

³⁴Ngic ye gombunga yombong merenu Yesungo negemma yofi edeec, “Ge Anutuac eucererengac hereau mi kecne.” Ifi deu yeni Yesu monggoc kpesimigecdeac kengecyunuu wagec.

³⁵Yesungo Anutuac womonnu edekpou ayemmema yofi kpesiyemmeec, “Mitiac negen negengngic yeneng Messia ye Dawidiac kisicfunac nocac deandae?” ³⁶Dawidi ye Asungo meefaiu yengenaoc yofi deec,

“KEBUNGO neac Kebu edeec, ‘Ge foinaugeng tacmana ngabafocga yeni hanigaac bageu faiyunubade.’ *(Mitiyegec 110:1)*

³⁷Dawidi yengenaoc ‘Neac Kebu’, kparec. Nga Messia ye dafiu Dawidiac bangeha ande?” Ifi deu ngicngac habutoa yeneng negendzidziegoc.

³⁸Ifi anggec Yesungo edekpou ayemmema yoac yofi torokpema edeyunuec, “Ngeni mitiac negen negengngic yeneac henghomema kecbisia. Yeni songonginaac amma ngakpi herea heima kecgec ngicngac yeneng wenacngerec deyemmegecdeac emeneclu kenghaandae. ³⁹Amma kpekpeturang amau nga yakatoa nasou warac warac tatacfu tacbesonga songongina angkecde. ⁴⁰Amma yeni ine ngachodzec yeneac ama wangecyunuandae. Amma negen ngereengunugecdeac nunumu herea here numuandae. Yeni ikocfaka ifia angandaeac turunga ebiriangoc megecde.”

⁴¹Anu Yesungo womonggac sesekatapa nobohau tacma henu ngicngac homacngo dzo imohai faigec kemeu ngic finactoagoc homacngo hama

^f 12:32 Yesaia 45:21

dzo ebiriangoc faigec kemeec. ⁴²Anu ngac hodzec mongngo ifingoc hama peni sacsac yohockang faiu kemeec, imoc toea mong kapianecsac. ⁴³Faiu Yesungo medacfora deu hagec yofi edeyunuec, “Foracngoc, ngac hodzec hiedzoya kpac yombong dzo faidacmoc, yeng ngicngac sasawa sese faidau, yeni feracyunude, imoc edengunuduae. ⁴⁴Ngicngac tosea sasawa, yeneng finactoangina wakema made, imohacnac sesengina faidau. Nga ngac ye ine wiac femidac, imocnoc hafoangoc faidacma entegeng kecde.”

13 ¹Anu Yesungo Anutuac womonunac mama kemmanu medacfora yeneanunac mongngo edeec, “Kpoukpou, hoc gombunga gombunga nga ama kuneng kuneng tackende, imoc henna.”

²Ifi deu Yesungo yofi edeec, “Ama kuneng kuneng tackenu hennec, imoc kecma naso mong haude, imohai wasaingic yeneng imoc sasawa hembarackegecde. Hembarackegec hoc mongngo monggac witiau wagec mi tarude.”

³Yesungo Oriwa tikiu Anutuac womong kiwa dindingacfu tacmanu Petoro nga Yakobo amma Yohane nga Anderea, yeneng yegoc tembucfu kecma kpesimigec, ⁴“Ge yocac dedang, imoc noc nasoac fingerude nga naso imohai noc soi fingecmanu yocac sasawa imoc seriude?”

⁵Ifi degec Yesungo yofi edeyunuec, “Ngic mongngo ikocfu wangepngunubacac ngeni henghomema kecbisia. ⁶Ngic homac yeneng hama neac kpac kpacma degecde, ‘Ni Messia.’ ifi dema ngicngac homac uba mesufu ayemmegecde.

⁷Dzikactoaac siduc bangec wegenaunac nga bangec hereaunac hau ngeni imoc negemma mi kpidohobisia. Foracngoc, faka ifia fingecceso. Nga naso wisic wisickea ine imohai bic mi haude. ⁸Bangecareng goa yeneng bangecareng ogofocnginagoc dzikac kpema kecgecde. Nga ngictau monggac arengngo ngictau monggac areng yenigoc ngaba angemegecde. Bangec monnu nga monnu usoc meude amma bodinaso fingeckenude. Nga faka yomoc, imoc wiac gboria fingecceso andeac ngac gadze kiude ifi isoc ande. ⁹Imocac ngeni ngenaocngoc garengemema kecbisia. Ngic yeni yocafu faingunugecde amma kpekpeturang amau dzikacngo ngunugecde. Amma yeni neac amma ngictau nga gawana yenearu yocafu faingunugec ngeneng ihai namma ni dekperaginubisia.

¹⁰Ngeni bangeha bangeha ngicngac siduc gombung edekpou ayemmegec negendacgeguc ¹¹ngic mengunuma ngic goa yeneac mariu faingunugecde, ngeni naso imohai, ‘Dafi denide?’ dema mi negengebiribisia. Tiri Asungo naso imohai yocac enacnginau faiude, ngeni imoc debisia. Ngeni yocac imohai degecde, imoc Tiri Asuarunac ambeso. ¹²Anu dac mongngo munea enara yeneac mariu faiu yeneng homecfa faigecde nga manggac mongngo medahaac imocngoc anude. Nga nambarac yeneng nonggo mangfocngina deendema ayemmema homecfa faiyunugecde. ¹³Nga ngicngac sasawa yeneng neac kpacnaac amma ngeni

ubango ukungunugecde. Nga ngic mong ye seserigoc kecmanu nasotoa haude, yeng komoc kpeude.

¹⁴Anu ngic mong ye yoac yomoc osoude, yeng imoc negentegecbeso. Wiac mangac manganea wiac sasawa kpetotieude, imocngo ama kpaegocfu emma nanu henggecde,^g faka imoc fingeru ngicngac Yudaia bangecde kecdae, ngeni worama tikiu embisia. ¹⁵Nga mong ye ama witiau tacde, ye kemema ama manau emma wiac mong mi mebeso. ¹⁶Nga mong ye semeng uau nande, ye ngakpi hereha meudeac mi dzigenebeso. ¹⁷Amma ngac heregoc kecdae nga nenggac sabac namuu meyunukecdae, yeni naso imohai ebictoanginagoc anggecde.

¹⁸⁻¹⁹Naso imohai kpendzeng kuneng siriha mong yombong figerude. Anutungo hanac hanaheaunac bangec sasawa meficgeecfunacngoc erema yaguc kecdimbe, naso imocac manau kpendzeng ifia mong mi fingerec amma ngade naric mi fingecebesande. Imocac amma ngeni wiac imoc nomannasou mi fingerudeac numubisia. ²⁰Kebungo naso imoc mi mewegenebac dede ngic mongngo komoc naric mi kpebac. Ngic meisingyunuyunuya, yeneac amma naso imoc bic herec herecgea fede.

²¹Naso imohai yoac yofi fingerude, 'Henggec, Messia yei fingece.' me, 'Ye edi fingece.' Ngicngac ifi degecdeu ngeni mi negensingyunubisia. ²²Imoc yofiac, ngicngac fingece ma ikoc amma degecde, 'Ni Messia.' yeni nga profete ikoha yeneng fingece ma ngicngac uba mesufu ayemmegecdeac ngicngac tobangyunuma faka kuhagoc nga morora megecde. Amma yeni sing meficgegecdeu ngicngac meisingyunuyunuya ifingoc ikocfu wangecyunugecde. ²³Faka sasawa imoc mi fingece manau imoc bic edengunuduae. Ngeni imocac negemma henghomebisia.

²⁴Anu kpendzeng imoc wisickemanu imohai
'wenackiwa kundung kpeu afokperagia mi fingerude. ²⁵Nga asomeng
yeni kurumennunac fotockema magec kurumenga kurumenga
yeneac kuc sasawa kpemindzahegecde.' (Yesaia 13:10; 34:4)

²⁶Naso imohai ngeni Ngicac Medac henggec yeng kuctoaya nga kibikperagitoayagocngo hoennu haude.^h ²⁷Hama angerofora sueyunuu bangec nga kurumeng tegia noboc noboc wisickede, imohai kenggec yengenaoc ngicngac meisingyunuec, yeni kpedzucyunugecde.

²⁸Fig icngo hania edekpou angemmeu ngeni imoc negenghomebisia. Fawaya doku doku amma besaiu ngic ngeni yofi negengandae, wenac naso ande. ²⁹Nga ngeni wiac dedua, imoc fingeru hemma ifingoc yofi negembisia, Ngicac Medac nasoya bic wegenema hama nagu ngadeau nandenoc. ³⁰Foracngoc, areng yomoc ngeni mi homemagec wiac yomoc fingece darude, imoc edengunuduae. ³¹Foracngoc, bangec nga kurumeng yeri kecma kpac anecde nga neac yoac ine mi kpac anude.

^g 13:14 Imoc ama kpetiac. (Danie 9:27; 11:31; 12:11-13) ^h 13:26 Danie 7:13

³²Nga faka imoc noc uamemeu amma aua nofu fingerude, imoc mongngo naric mi negenude. Kurumenggac angero yeni imoc mi negenggecde nga Medacngo ifingoc mi negenude. Manggacngosac naso imoc negende. ³³Ngeni garengngina mema ubagbori kecbisia. Nocac ngeni naso mi negendae.

³⁴Imohai faka yofi isoc fingerude, ngic mongngo amea wama bangec monnu kenudeac negenec. Ifi amma ye amagareng wanacngicfora amaac wiac uanginaacsoc garenggegecdeac uayoac deyemmema nagugareng nagu kicfifi nanudeac edeec. ³⁵Imocac ngeni ubagbori kecbisia. Minginango ama toforemanu me tofocnac dzongiau me ama werec wereckenggac me asoac nasou dzigeneude, ngeni imoc mi negendae. ³⁶⁻³⁷Ngeni gaufemagec hama ngenembacac yoac yomoc ngeni nga ngicngac goa sasawa edengunuduae. Ngeni imoc negemma ubagbori kecbisia.”

14 ¹Makekenggac naso nga ic sogong yisya kpac nene, imocac hombanggac uameme yohockang fec. Femanu womong gareng enara nga mitiac negen negengngic yeni Yesu nofusing kic mesufu ammima mema kpegec homeudeac sing hofocma ²yofi degec, “Ngicngac yenearu dzikac sicsauc fingeccbacac amma ye hombang nasou mi mebesonga.”

³Anu Yesungo Betania amau ngic mong kpara Simong kubecserigoc, yeac amau yaka netarec. Netacmanu ngac mongngo alabastros kirungⁱ mong kerecdoku homung kerengagoc metarec, imoc mehaec. Doku imoc narda foranac memea amma buma engena yombong. Ngacngo imocnoc mehama kirung ubea kpetackema Yesuac oruhau kpakema nadzicmiec. ⁴Nadzicmiu ngic goa ihai tacgec, yeneng imoc hemma dehesi amma degec, “Ye nocac wiac buma engena ifi kpedzonggede?”

⁵Doku homuna gombunga ifiango kifa mocguac uabung^j ferahema kirecgeu yeni imoc ngicngac makpekpea yemmegec ngereebac.” Ifi dema ngac yoac gereagoc ammigec.

⁶Ifi ammigec Yesungo yoacngina negemma yofi edeyunuec, “Ngeni nocac ngacac ifi degec ubaebic meficgeude? Ngeni faka imoc wagec. Ye faka gombunga yombong anende. ⁷Ngic makpekpea yeni nasosoc ngenigoc kecgec ngeni meficyunubeso angemmeu naric meficyunukecgecde. Nga neng ine ngenigoc nasosoc mi kecbade.

⁸Ngac yomocngo sebina doku homunagocngo nadzicmiu ngeni fareнна tonggogecde, imocacnoc yeng hanahema meefainude. Meefainuma yeac uaareng fede, imoc bic mesiude. ⁹Foracngoc, ngicngac yeneng siduc gombung bangectoa bangec, imohai kemma ngicngac edekpou

ⁱ 14:3 Alabastros kirung imoc hocngo memea nga ubahereagoc amma tapea kpac.

^j 14:5 Ye 300 denari deec.

ayemmegecde, imohai ngac yomocngo faka anec, imoc ifingoc degec negenggec feude, imoc edengunuduae.”

¹⁰Anu medacfora 12 yeneahunac mong kpara Yuda Karioto amaunac, yeng Yesu meyemmeudeac dema womong gareng enara yenearu kenec.

¹¹Kenu yeni ubangerec negemma dzo migeceac degec. Ifi degec Yudango naso gombang damohai Yesu doc mema yereac mariu faiude, imocac kicfifi kefec.

¹²Ic sogong yis kpac, hombang imocac hanac hanaheau makekenggac ramamedaha kpeherece angandae, naso imohai Yesuac medacfora yeneng Yesu kpesimigec, “Neni dahai kemma makekenggac ramamedaha nenideac memengere annideac negennec?” ¹³Ifi kpesimigec yeng medac yohockang yofi dema sueyuruec, “Ngeri taonnu emma ngic mong dokuenanga tofohoma hau yegoc ewacma ye modacbesera. ¹⁴Modarec kemma amau enude, ama imohai ama mingina yofi edebesera, ‘Kpoukpoungoc yofi kpesigende, “Ama mana damohai mengerenenna ni medacfocnagoc makekenggac ramamedaha nenide?” ’ ¹⁵Ifi deec yeng ama witiau amamana mong kuneng ihai wiac bic mengec mengerea tadcacde, imoc edzacngurucu ngeri imohai iwainina mengerebesera.”

¹⁶Ifi deu medac yeri ama wama taonnu enoc. Emma Yesungo edeyuruec, imocac sirihau wiac meficgedacma makekenggac ramamedaha ohomengere anoc.

¹⁷Anu ama toforemanu Yesu nga medacfora 12 yenigoc kensikegec.

¹⁸Kensikema yaka netacma Yesungo yofi deec, “Foracngoc, ngeneahunac mongngo ni ngaba yeneac mariu fainuude, yennoc nigoc yaka nede, imoc edengunuduae.” ¹⁹Ifi deu medac yeni negengebirima tembuc tembuc kpesimigec, “Ge imoc neac denec me?” ²⁰Ifi degec, yeng yofi merengyemmeec, “Imoc medac 12 ngeneahunac mong anu yeng nigoc ic sogong terau nemuruckede.

²¹Ngicac Medac ye wangunuma kenude, imoc neac negemma oho ohoya bic fede. Nga ngic ye Ngicac Medac doc meude, ye ine sowehagoc. Ye nonggeaac here manaunac mi fingebacfu efaibac.”

²²Anu netacmagec Yesungo ic sogong mong mema Anutu ubangerec edema ic sogong imoc mendzicma medacfora yemmema yofi deec, “Ngeni yomoc megec, imoc fusina.” ²³Ifi dema kpakenec mong mema Anutuac ubangerec dema sasawa yemmeu negec. ²⁴Negec yofi edeyunuec, “Yomoc neac sac, imocngo dzadzahac amma imoc ngicngac homac yeneac amma kpetic kpetinggea. ²⁵Foracngoc, ni waing gbomeaac dokuya monggoc mi nene kecbarengoc Anutuac eucerereng manau waing gboria nebade, imoc edengunuduae.” ²⁶Anu yeni Anutuac yegec heigec,^k Heima taong wama Oriwa tikiu enggec.

^k 14:26 Yegec, imoc Mitiyegec 115-118.

²⁷Emma Yesungo yofi edeyunuec, “Ngeni sasawango neac negemmangang amma wanugecde, imoc yofi bic oho ohoya fede.

‘Ni ramagareng kpeba yeni sasawango sinsararang kpegecde.’

(Dzekaria 13:7)

²⁸Anu neng ine gborima yacma waraingemmema Gariraia bangecfu kembade.” ²⁹Ifi deu Petorongo deec, “Ngicngac sasawango negemmangang amma wagugecdeu neng ine imoc naric mi ambade.”

³⁰Ifi deu Yesungo yofi edeec, “Foracngoc, yaguc tofocnac kokorecngo arohou atac yohockang mi ammanu geng neac busickpena harebec bic anude, imoc edeguduae.” ³¹Ifi deu Petorongo serimangoc deec, “Ni gegoc homebade isoc sebi ine naric mi heibade.” Ifi deu ogofora yeni sasawango imocngoc degec.

³²Yesu nga medacfora yeni ua bangec mong kpara Gedzemane, imohai kenggec. Kensikema yeng medacfora yofi edeyunuec, “Ngeni yei tacmagec ni numubade.” ³³Ifi dema Petoro nga Yohane amma Yakobo meyunuu kenggec. Kemma negen negenga fonggou negengebirima ³⁴yofi edeyunuec, “Ubaonganango ebiryombonggeu homebeso anende, imocac ngeni yei garenggina meemema tacgec.” ³⁵ifi dema kpesima kemma bangecfu makpefema yofi numuec, “Imoc naric anu naso imocngo feracnubeso.” ifi ³⁶numuma yofi deec, “O Manggac manna, gearu wiac sasawa imoc efea. Ge kpakenec yomoc wangecnuna. Anu neac songo ine mi seribeso, kpac. Geac songo nga negen negeng imoc seribeso.”

³⁷Ifi numuu wisickeu dzigenema medacfora yenearu hama yenenu yeni gau fegec Petoro yofi edeec, “Simong, ge gau fenec, ge naric aua mocguac manau gaugbori kecbang me? ³⁸Nga faitobannu embauac ngeni ubagbori kecma numugec. Ongaasungo efaide nga sebingo ine ebiride.”

³⁹Ye ifi dema monggoc kemma nunumu imocngoc numuec. ⁴⁰Numuma hama yenenu yeni monggoc gau fegec. Nocac yeni kicngina ebiriec. Nga ye yoac deu yeni meremmigecdeac obohogec. ⁴¹Nga ye atac harebecfu dzigene hama yenemma yofi deec, “Ngeni gau femangoc kecdac, imoc naric mi ande. Yaguc ine wisickede nga naso bic hadac. Negenggec, ngic yeni Ngicac Medac kererema kopocsicmeme yeneac mariu faigecde. ⁴²Benukererec ngicngo hadeac amma ngeni yacgec kenni!”

⁴³Anu Yesu ye ifi demanungoc medac 12 yenearunac mong Yuda, yeng hau habu kunengngo wasaibeang nga gbarucnginagoc ye modacgec. Anu yeni womong gareng enara nga mitiac negen negengngic amma yudangic enarafocngina sueyunugec, yenearunac hagec. ⁴⁴Hagec benukererec ngicngo yofi derecgeyemmec, “Ni ngic muduckebade, ngeni yenoc mendanggema garenggeyombonggema mekembisia.”

⁴⁵Anu Yuda ye hama Yesuaru bic kemma, “Kpoukpou.” dema muduckeec. ⁴⁶Muduckeu yeni Yesu maria noboc noboc mema mendanggegec.

⁴⁷Mendanggegec medac yenearunac mongngo ine wasaibeang kpedzima womong garengtoaac wanacngic kpema kedzaha noboc herecgeec. ⁴⁸⁻⁴⁹Nga Yesungo yofi edeyunuec, “Ni wenacsoc ngenigoc kecma womonnu edekpou angemmeba ngeni imohai ine mi menugec. Nga yaguc ine godzungic meandae, ngeni ifi isoc wasaibeang nga gbaruc mema menugecdeac hadae.” Yoac mitikibiui fede, imoc sasawango ine fingecdacheso.

⁵⁰Yesungo ifi deu yeac areng sasawango ye wama kengec woragec.

⁵¹Anu sebigborimedac mongngo kporuc linengngo memea imocsac kpeec, yeng Yesu modaru megec. ⁵²Memagec, yeng kporuc kpesima senggang worama kenec.

⁵³Anu yeni Yesu mema womong garengtoa yenearu mekenggec. Mekenggec womong gareng enara sasawa nga enarafocngina amma mitiac negen negengngic, yeni kpeturanggema hagec. ⁵⁴Nga Petoro ye ngadenginau hereaungoc modacyunu kemma womong garengtoa yeac amaac oda manaungoc enec. Emma imohai uamedac yenigoc gerec dzeunegemma tarec.

⁵⁵Anu womong gareng enara nga yudangic yeneac tutumangtoa memba sasawa adzoragec. Adzoroma yeni Yesungo faka mangana dafi anec dema kpehomegecdeac manganaac kopocsicac yoac anggecdeac obohogec. ⁵⁶Nga ngic homacngo ikoc amma yeac enacfu faifaiyoac degec nga gubeyoacnginango socfungoc mi anec. ⁵⁷Ngic goa yeneng kicnginau emma namma yofi dema enacfu faifai ammigec, ⁵⁸“Ye yoac mong yofi deu negening, ‘Ni womong yomoc ngicmaringo memea, imoc hembareckema uameme harebecac manau mong ngicmaringo mi memea mebade.’” ⁵⁹Nga kopocsicac yoacngina imocngo ine ifingoc socfu mi anec.

⁶⁰Anu womong garengtoango yacma botucnginau namma Yesu yofi kpesimiec, “Geac yoac dedae, imocac noboha mong mi denade me?”

⁶¹Ifi deu Yesungo ine waicke namma turunga mong mi merennec. Nga womong garengtoango monggoc kpesimiec, “Ge Messia, Kenec keneheac medac me?” ⁶²Ifi deu Yesungo deec, “Ni imocnoc.¹ Anu kecma ngeni Ngicac Medac Kuctoa mingina yeac foiaugeng tacma kurumenggac hoennu kicnginau hau henggecde.” (*Mitiyegec 110:1; Danie 7:13*)

⁶³Ifi deu womong garengtoa yeng ngakpihereha membarackema deec, “Yoacninaac boingicac monggoc mi obohonide. ⁶⁴Ye Anutu emmima deu bic negendau, imocac dafi negendae?” Ifi deu sasawango ye kopocsihagoc negemma homeudeac deserigec.

⁶⁵Ifi deserigec ngic goa yeneng sofohoma kiwa kporucngo biranggema marigung bungngong heima degec, “Ge kpefingyoac dena!” degec gareng nanggec, yeneng ye mema kpegec.

¹ 14:62 “Ni imocnoc.” imoc Anutuac kpara mong. Ge “Yoac goaac dedekperagi.” henna. Hafac 1128.

⁶⁶Anu Petorongo oda manau nammanu womong garengtoaac wanac naroang mongngo ihai haec. ⁶⁷Hama henu Petoro ye gerec dzeunegemma taru kiwa yearu fima deec, “Ge ifingoc Yesu Nadzaretenc, yegoc kefoc.” ⁶⁸Ifi deu Petorongo ine sebi heima deec, “Ye mi negemmiduae nga yoac denec, imoc mi negengegeduae.” Ifi dema ama naguyau kemeu kokorec arohoc. ⁶⁹Arouhou wanac naroangngo Petoro hemma ngic wegenac nanggec, torokpema yeni monggoc edeyunuec, “Ngic yomoc ye yenearunac mong.” ⁷⁰Ifi deu Petorongo ine monggoc busickpeec.

Nga naso mi hereemanu ngic imohai nanggec, yeneng monggoc degec, “Foracngoc, ge yenearunac mong. Ge Gariraia bangecfunacngoc.” ⁷¹Ifi degec ye yengenaoc sowecemema desopec amma deec, “Ngeni ngic dedae, ye mi negemmiduae.” ⁷²Ifi deu imohaingoc kokorecngo arohou yohockang anec. Anu Petoro ye Yesungo yoac edeec, imoc negensiec, “Kokorecngo arohou atac yohockang mi ammanu geng neac busickpena harebec bic anude.” Petorongo imoc negensima ubahodung kuneng mema kiachodung kiarec.

15 ¹Asoacngoc yombong womong gareng enara nga yudangic enarafocngina amma mitiac negen negengngic nga yudangic yeneac tutumangtoa memba sasawa, yeneng yoac deserigec. Deserima Yesu maria dedeckema Piratoaru mekenggec. ²Mekenggec Piratongo Yesu kpesimiec, “Ge yudangic yeneac ngictau me?” ifi deu merenec, “Imocnoc geangaoc denec.”

³Nga womong gareng enara yeneng Yesu yoacfu faima yeac haniaya homac degec. ⁴Ifi degec Piratongo monggoc kpesimiec, “Yeni geac yoac homac yombong dedaemoc, imoc negemma turunga mong mi merennade me?” ⁵Ifi deu Yesungo turunga monggoc mi merenu Piratongo negen negeng ua homac meec.

⁶Anu makekeng nasousoc ngic mong witicamau takefu yudangic yeneng yeac kpara kpacgec Piratongo yenoc witicamaunac wau makefec. ⁷Amma ngic goa warac ngicngac here miac miac faka amma ngic goa yunuhomegec witicamau faiyunugec, yenearunac ngic mong kpara Baraba. ⁸⁻¹⁰Nga womong gareng enara yeni Yesuac keracmangang amma yeac mariu mekenggec, Piratongo imoc bic negenec. Ifi negenu habutoa yeneng hama Piratongo angkefec, ifi isoc anudeac kpesimigec yeng meremma yofi kpesiyemmeec, “Yudangic ngeneac ngictau yungecngemmebadeac negendae me?” ¹¹Ifi deu womong gareng enara yeneng habu fenggeyemmegec yeneng Yesu wama ine Baraba naric yungecyemmegecdeac degec.

¹²Ifi degec Piratongo monggoc meremma kpesiyemmeec, “Anu ni yudangic ngeneac ngictau dedae, yeac dafi ambade?” ¹³Kpesiyemmeu yeneng arohogec, “Ge ye mariponnu kpna homeu.” ¹⁴Ifi degec Piratongo monggoc kpesiyemmeec, “Nga ye noc kopocsic meec?” deu ine yeneng

monggoc seriangoc arohogec, “Ye mariponnu kpebesena.” ¹⁵ Ifi degec Piratongo habu yeneac negen negeng modarudeac negemma Baraba wau kenec. Nga yeni Yesuac sebia dzikacngo kpemaguc mariponnu kpegecdeac wasai maringinau wayemmeec.

¹⁶ Anu wasaingic yeneng Yesu mema gawamang yeneac amaoda manau emma wasaingic sasawa hafoangoc kpedzucnegec. ¹⁷ Kpedzucnedacma ngakpiherec mong giweng giweng heimima somang batihema ira isoc oruhau heimigec kemeec. ¹⁸ Kemeu eweheihei siricfu kpacma edegec, “Ohec, yudangic yeneac ngictau.” ¹⁹ Dema yasungo oruhau kpema sofohoma haniau fafoc heima numumigec. ²⁰ Anu yeni defagoc ammigec wisickeu ngakpiherec sacsac imoc hesima yengena wamba heimigec kemeu mariponnu kpegecdeac mema ngadeau kenggec.

²¹ Kemmagec Kirene taonunac ngic mong kpara Simong, ye Aresande nga Rufu yereac mangngira, yeng semeng uaunac sinnu hamanu wasaingic yeneng Yesuac maripong tofohoudeac ngombonggegec tofohoec. ²² Tofohou yeni bangec buma mong kpara Gorigata, titiha hatasic, imohai Yesu mekenggec. ²³ Mekemma sopo mong aengagoc kpara mira, imoc wainggoc yerecgema migec nga yeng ine imoc waec.

²⁴ Anu yeni ye mariponnu kpema wambaya mederema wiac mong me mong merang meude, imocac kpeing kpegec. ²⁵ Yeni asoac 9 kirocфу Yesu mariponnu kpegec. ²⁶ Kpema ye yoacfu faigec, imocac hania tafebisicfu yofi ohogec, “Yudangic yeneac ngictau.” ²⁷⁻²⁸ Anu yeni godzungic yohockang, mong foiau nga mong kanayau yegoc mariponnu momoc yunugec. Ifi anggec yoac mitikibiu oho ohoya yomoc seriec,

“Ye manganameme yeneanunac mong, ifi negenggec.” (*Yesaia 53:12*)

²⁹ Anu ngic ihai kengha anggec, yeni Yesu deendema ammima orucngina kpatitickema degec, “Ngeni ngic imoc henggec, yeng womong hembarackema wenac harebecac manau monggoc meudeac deec. ³⁰ Ge geangaoc onggongemema mariponnunac mesiemema mana!”

³¹ Anu womong gareng enara nga mitiac negen negengngic, yeneng ifingoc ye desusuic ammima denegeng amma degec, “Ye ngic goa onggongyunukefec nga yengena ine naric mi onggongemeude. ³² Ye Messia, Israe neneac ngictau kecdengo yaguc mariponnunac mau hemma negensinggenide.” Nga ngic yohockang mariponnu ifingoc yurugec, yereng ifingoc deendema ammioc.

³³ Wenac dzongiau 12 kiroc ammanu imohai ama kundung kpema kundungngo bangec sokoma fekemmanu 3 kiroc marai anec. ³⁴ Imohai Yesungo ubaudumeng kunengngoc kpacma yofi deec, “Eroi, Eroi rama sabaktani.” Imocac titiha yofi, “Anutuna Anutuna, ge nocac wanudang.” (*Mitiyegec 22:1*)

³⁵ Ye ifi kparu ngic wegenac nanggec, yeneanunac goango imoc negemma degec, “Negenggec, ye Eria kpacsambic ammide.”

³⁶Ifi degec ngic mongngo nedzikiemma kondung sobing mong mema waing aengagocfu nemuruckema yasuu faiu Yesuac enarau enu deec, “Tomai namma henni, Eriango hama mesiude me kpac!” ³⁷Ifi demanu Yesungo ine ubaudumeng kunengngoc kparu asuya ereec. ³⁸Ereu womonggac kporuc kuneng^m imoc dzongiausing wihacnac tohoma mau yohockang anec.

³⁹Anu wasaigareng yeac kicfu nanec, yeng Yesungo kparec nga homeec, imoc hemma yofi deec, “Foracngoc, ngic yomoc ye Anutuac medacnoc.” ⁴⁰Nga ngac goa ifingoc hereau namma faka fingerec, imoc henggec, yeneac botucfu Maria kpara mong Madara nga Maria, Yakobo mong munea deandae, ye nga Yosec yereac nonggongira amma Sarome, yeni yenhafoc nanggec. ⁴¹Yesungo Gariraia bangecfu kefu ngac imoc yenennoc ye modacma meficgekecgec. Amma ngac tosea homac, yeni Yerusarennu yegoc bic kemma ihai ye hemma nanggec.

⁴²Marai bic anu hombanggac memengereac naso wegene hau sabataac naso femanu ⁴³Yosefe Arimataia taonnunac, yeng ihai haec. Ngic ye kpactoayagoc yudangic yeneac tutumangtoa, imocac membangina mong amma ye Anutuac eucererenggac tomai kefec. Yeng kengeha kpac Piratoaru kemma Yesuac fareng meudeac kpesimiec. ⁴⁴Kpesimiu Pirato ye Yesungo bic homeec, imocac kpidohoma wasaienara kpacma Yesu bic homedac me kpac, imocac kpesimiec. ⁴⁵Kpesimiu Yesu bic homedac deu Yesuac fareng Yosefe desimiec.

⁴⁶Desimiu Yosefengo linengkporuc mong bummema Yesuac farenga mariponnunac mesiu mau kporucngo tembonggema kicsereu mekenec.ⁿ Kicsere imoc hocsirau singa usu usuya, imohai farenga faima hoctoa mong kpedidinggeu singa hedzickeec. ⁴⁷Anu Maria Madara nga Maria Yosec nonggea, yereng Yesuac farenga dahai faiec, imoc henoc.

16 ¹Sabata tatac naso wisickeu imohai Maria Madara nga Maria Yakoboac nonggea amma Sarome, yeneng kemma Yesuac fareng nadzicmigecdeac kerec homunagoc bummegec. ²Bummema sonda gboria hanac hanaheau asoacngoc ama wereckenu kicsereu kemmagec wenac ereec.

³Anu kemma yenaocngoc denegeng amma degec, “Merang hocsingaac naguya imohacnac hoc kpedidinggenemmeude?” ⁴Ifi dema kic fima henggec hoctoa imoc ine bic kpedic kpedidinggea. Nga hoc imoc kunengtoa yombong. ⁵Hemma kicsereu emma henggec medac mongngo ngakpihereha kongac kongac mong heiec, yeng foiugeng taru hemma kpidohoma kerecgec anggec. ⁶Ifi anggec yeng yofi edeyunuec, “Ngeni mi kengecngunuu. Yesu Nadzaretenc mariponnu kpegecmoc, ngeni

^m 15:38 Kporuc imoc ama kpetiac nga ama kpetiac yombong, yereac botucngirau faifaia.

ⁿ 15:46 Lineng imoc kpingding mong ambiaac ogea, imocngo wamba mekecgec.

ye hembeso hadae nga ye bic gborima yacdac, yei mi fede. Faigec fedac, fefe imoc henggec. ⁷Ngeni kemma medacfora nga Petoro yofi edeyunuec, ye waraingemmema Gariraia bangecfu kende. Anu ngeni imohai kemma ye meficgegec, yengenaoc edengunuec, ifi isoc.”

⁸Ifi edeyunuu yeni kpidohoma dzononggina fedeeccac kicsereunac worama kenggec. Amma yeni homac yombong kpidohoma kengecyunuecac amma ngic mong mi edeyunuec.

⁹Yesungo sondau yarec, naso imohai hanahema Maria Madara fingecmiec. Ye warac hadehade 7 yearunac kporarec, ngac imocnoc fingecmiec. ¹⁰Fingecmiu Mariango kemma ogofora yegoc momoc kecgec, yeni ubahodung negemma kiac kecmagec yofi edeyunuec, ¹¹“Yesungo bic yacdac kecde, ni hendua.” ifi deu yeneng ye mi negensinggegec.

¹²Anu imocac ngadeau ngic yohockang yeri amabangec monnu kembesonga kemmaec ye siriha mong amma fingecyemerec.

¹³Fingecyemeru yeri dzigenema goa edeyunuec, yeneng ine mi negensinggegec.

¹⁴Anu medacfora 11 yeni yaka nema tacmagec Yesungo fingecyemmeec. Nga ye yarec hemma edeyunuec, imoc mi negensinggegec nga ubangina serieccac amma ngaba siricfu yoac edeyunuec. ¹⁵Edeyunuma yoac yofi deec, “Ngeni bangectoa bangec, imohai kemma wiac sasawa Anutungo deu fingerec, yeni siduc gombang edekpou ayemmebisia.

¹⁶Anu ngic me ngac mong negensinggema mitidoku nadziru Anutungo ye ebicfunac mesiu komoc kpeude. Nga mong ye mi negensinggeude, yeng ine yoacfu makpeude. ¹⁷Nga negensinggegecde, ngenearu faka kuhagoc yofi fingerude. Ngeni neac kpacfu hadehade nga yafing kporacyunuecde amma nedzarangyoac uba gboriausung degecde. ¹⁸Ngeni boidzoc maringo megecde nga doku hodungagoc ngic memanganeyunuande, ngeni imoc negecdeu, imocngo mi memanganengunuude. Nga ngeni ngicngac hafeigoc yenearu mari faigec, yeni ngeregecde.”

¹⁹Kebu Yesungo yoac ifi edeyunuu wisickeu Anutungo ye kurumennu meenu yeac foiau tacde. ²⁰Anu medac yeni noboc noboc kemma siduc gombang ngicngac edekpou ayemmegec. Nga Kebungo yenigoc kefu yeni ua megec faka kuhagoc fingerec, imocngo yoara meseriec.